



柳田文庫  
文庫11  
D 85  
10





文庫 11  
D 85  
10

清容居士集卷第二十七

元 袁 桷 撰

神道碑銘

朝列大夫同僉太常禮儀院事白公神道碑銘

白於太原爲令族至金源氏興太原衣冠爲最盛而白氏兄弟相繼踵儒科故中大夫樞密院判官兼右司郎中輕車都尉南陽郡伯諱華字文舉其季也唐宋樞密無判官金天興帝賞器之特置職以寵由是相仍自郡伯始郡伯後居真定生子四人俱有時名君諱恪字敬甫少警敏三歲善作字書八卦八字有以見于鄉先生元公好問公作詩淡器之郡守上其能將薦于朝郡伯謝弗許稍長里之

清容居士集

010190555408

48-12137



先進張先生耀卿愛其才獎拔力成就至元中世祖遣使詣州郡試明經生復門役君首預選弱冠試吏揆姦拔冤獄具御史不能撓後爲河南按察司書吏有尉卒利孀婦財未終喪強贅於姑家旣而虐其婦復不禮其姑姑告於官絕之尉卒隱其罪屢訴終喪無明文事久不決君悉疏所犯聚邑人以告婦得終養其姑焉至元十四年江南建行臺御史大夫相威公慎簡所屬署君爲掾史卽條不便事凡二十大夫見世祖力陳之允十有八最著令者大辟成讞上刑部聽報可賈某公田租歲減什一十八年授從仕郎江東建康道提刑按察司經歷改荆湖占城等處行省都事時荆湖省臣某括財恣威福君度不可與共事辭

不拜後果受誅二十四年改浙西提刑按察司經歷遷平江丁母羅夫人憂以夫人喪葬于吳將終老焉會詔舉不附權臣自晦者有以君辭荆湖事薦于上除福建宣慰司經歷閩郡廣遠豐歉不同是歲汀州穀善收成兵所給糧不登數福泉興化穀驟踊有司議移三郡穀于汀君建言道途轉輸大無益發貴粟以賑三郡歸直于汀可多得穀誠兩便有司難之君署記曰使有罪願已獨受卒如其議而官之贏糧果增倍宣慰司復爲省君治六曹文牘以俟平章某公知君簿領有能名受其籍以付吏三十一年丞相太傅公爲湖廣平章君時爲都事俾陳樞密院及本省利便侍丞相入覲有旨允其奏復陞員外郎湖廣聯絡左



清容集卷二十七  
右江官吏秩祿歲一再受俸於省地遠得不償旅食有棄  
俸不願受者君建議隨所部以給迄今行之衡永戍兵耕  
閒田官出牛輸其租牛死不得落籍戍兵歲率鋤數十萬  
以酬君惻然計之曰牛死當納皮角于官除故籍而以官  
租捐納之則得矣戍兵由是免害有省臣獻廣西地肥沃  
可爲田徙湖南居民往耕之當調戶五千君力言不可平  
章公是其議奏止之獻田者復調兵征思明發運粟入賊  
境道遠雨淖荷擔者各持去志君憂有他變出直募民  
樂受以往峽州歲饑請粟于官有欲核驗始發君言饑民  
朝不及夕使核驗死當過半矣大德二年進本省理問官  
推誠燭幽莫有滯濫而言論風采彬彬文雅蓋以吏治濟

其儒行者與四年改江西省理問官究僞楮獄得直于時  
翰林承旨閻公復持士論賢否有言曰白文舉父子兄弟  
俱有文名敬甫幼負俊聲老不入翰林咎將誰執奏爲翰  
林待制復同僉太常禮儀院事儀度閒整贊導禋祀動不  
踰矩蒼顏玉立真善爲頌者也桷向爲翰林應奉幸得侍  
同朝聆議論接顏色寬厚平實言金諸老行事歷歷指掌  
晚自號竹梧其爲文不事雕飾扶掖後進侃侃自持知其  
於孝友有加也生丙午歲十有二月至大二年己酉四月  
卒于官年六十有三積階至朝列大夫有詩文若干卷藏  
于家某年某月某日葬于真定路真定縣之朱洛村曾祖  
仲溫隱德里居妣李氏祖宗完金故贈朝列大夫輕車都



滄容集卷二十七  
尉南陽郡伯祖妣李氏妣張氏羅氏君羅出也娶盧氏中  
書架閣管句順之女翰林承旨摯之女弟男五淵安福州  
儒學教授沅蘄州路蒙古教授皆蚤世湛今承事郎浙東  
道宣慰司都元帥府都事洙國子學正灝江西湖東道憲  
司書吏先卒女三長適李棠靜江路稅課提領次適甄遂  
良季適李權河間路某州樂壽縣尹孫男八貞采暹辟楸  
樞桂孫女四曾孫男一女三湛爲元帥府都事桷適請  
告歸里以事狀拜且言先君子嘗得與子同院銘莫如子  
桷謝不敢辭乃爲之銘曰

有完者圭藉之以韋不泄其溫禮祀用祇受中以生剛柔  
是宜木神則仁其用不陂顯用太常幼敏且岐挹其粹精  
飭躬以教黜明養潛爰燭姦暴匪伊求之我曷望報道在  
一源挈以簡要詹詹炎炎益飾其巧佩玉舒徐六轡濡如  
執簡以陳矢言不迂彼計功者承色善趨較以虧成卒喪  
其軀有高維閔茲爲守儒恆山之陽松柏茂直詔于雲仍  
是謹是則臚仕之初壘簾踵奕詢彼故老曰惟祖德我銘  
孔昭庸告爾無斁

贈翰林學士嘉議大夫馬公神道碑銘

浙東道宣慰使都元帥馬公踵門以告曰惟吾先公隧道  
碑未立子職在太史勳舊死事貞逸之士嘗焯焯紀著登  
載金匱先公仕雖不顯其見知于世祖受學于碩師河內  
後進猶能誦習遺事敢以行實告它日上其事史館則子



實前史官庶幾傳信可永久敢再拜以請謹按公諱充實  
字士輝覃懷河內人父庭大父某皇朝入中原略地定圖  
貢詔大帥專除授嘗得署郡縣副貳兵亂大父以上名諱  
弗可攷公八歲遭大喪從母完顏氏攜載以從其夫李侯  
侯長萬夫隨征六盤善謀畫裨贊李益取自助六盤爲高  
昌要衝高昌之俗收經史立校官地與西域接故其聲音  
文字詳於諸國公得其說而習焉世祖皇帝大一寰宇命  
以其國語別立文字用於印章宣勅其字母與西域相近  
公旁曲通暢單出雜比會其指歸學者爭詣門請業許文  
正公薦于上以儒服入見于柳林委曲問時事悉以國語  
對上大喜錫以錦帽語翰林學士承旨某公左丞相耶律

公宜以爲稠人師遂僅授將仕郎懷孟路蒙古教授再授  
承事郎襄陽路均州判官然不樂仕進嘗曰我能知樹藝  
遂力治其閒田因原隰以種所宜木春華秋實茂鬱滿道  
過者咸曰此馬公手植也縣西有田二十餘頃皆先世業  
歲久勢家悉占其肥沃後服公純德始願歸其田卒酬直  
以受方許文正公講授鄉里時靳許可遊其門者察以歲  
月始命執弟子禮獨見公篤厚溫謹卽俾就列授性理大  
義以躬行爲先公能守之故其退讓無干進之念而恂恂  
里閭克修克儉皆師訓也文正公侍帝所無虛日懷孟素  
產地黃可釀酒其脩治貴精謹上問文正卿弟子孰爲誠  
實卽以公對公素知製法得山中石泉如法釀以進許公



之薦將由是俾嚮用而事若不偶公復不以爲介豈安於命分者與後有奏爲河渠使者又將奏爲蒙古院學士皆力謝不受里中有德大師金內族年過百齡能知人壽夭前後俱尊異之公甫生一日德夢其故友宋讓曰吾今爲馬家子矣後抱示之摩頂卽爲笑容噫死生事不可詰若前史所載又有若似焉者寧勿書卒于至元二十九年四月六日年六十葬于河內縣青平村先塋之次娶劉氏征西萬戶某之女後公四年卒生二子長鑄卽元帥公次鎔朝列大夫廣西海北道肅政廉訪副史次娶李氏生二子銳奉議大夫廣州路治中次綱皆蚤世女五人適陳吉甫張漢卿王某朱仲德楊某鑄男四長德潛內監尙衣次德

源德淳皆國子生德淳今爲鎔後德淵府學生女四適太祝王世昌戴彥實李起宗郭成可銳男二德潤德溫曾孫一孟孫至大三年鑄爲禮部郎中推恩得贈翰林學士嘉議大夫上輕車都尉扶風郡侯諡莊惠劉氏贈扶風郡太夫人李氏封扶風郡夫人鑄官中奉大夫浙東道宣慰使都元帥又贈公某官劉氏贈某夫人大父贈某官大母完顏氏贈某夫人桷於是有言曰仕嘗患弗及其身歿而子榮推其榮以及其先而爲善之效著矣世固有極其顯光歿無德以傳卒至于子孫流播可勝道哉元帥公中外揚歷清白益者今帥浙東事不苟求而明燭幽隱不爲己甚遺其後者猶先公之志是宜銘詩以昭來世銘曰



清容集卷二十一  
相彼土田或隰或陵淡根平培蒨焉以升實者缶之茹者  
釜之梓漆是供絲枲是輔種不亟求曰惟歲年視彼種德  
亦云其然溫溫馬公植善無倦仕匪蹇時從我之願經緯  
聲音服習訓則奉盈彌謙以退以默詔爾孫曾戰競是承  
蔽芾長松勿替厥聲

翰林學士承旨榮祿大夫遙授平章政事贈光祿

大夫大司徒上柱國永國公諡文康閻公神道碑

銘

世祖皇帝應期握圖肇函諸夏文經武緯各當厥職粵惟  
東平地接鄒魯時則有嚴忠武公披荆翦蕪扶植儒學作  
成逢掖卒能敷文帝庭風動八表鄆之得人號稱至盛而

閻徐李孟世名以四傑焉自至元至于大德更進迭用詔  
令典冊則皆閻公所獨擅公諱復字子靜幼入東平府學  
蜚聲炳著操筆綴詞賦音節和暢融液事理率占爲舉首  
幼從贈翰林學士康公康大器之太常徐公道隆年長有  
聞譽不敢以後進待公在翰林最久贊書積几高下輕重  
擬議精切傳誦以爲楷則其待僚案擇敏秀者自近不滿  
意者不復強以文墨任滿不調雖請託亦不得以敘遷故  
事表賤自待制而下分選公命各爲一通輯其精良融爲  
一家而別擬以示其屬始仕東平行臺書記御史臺掾至  
元八年入翰林爲應奉文字進脩選十六年陞翰林直學  
士十九年侍講明年兼集賢侍講學士于時兩院皆領會



同館由是自應奉至侍講皆兼會同二十三年陞翰林學士改集賢學士大德元年復除翰林學士四年拜翰林學士承旨而知制誥脩國史皆視其職以進其補外職則僉河北河南道提刑按察司事浙西道肅政廉訪使世祖陟方召公草詔于上都成宗繼崩復召公上都武宗卽位首上疏曰惜名器明賞罰擇人材朝論韙之賜金錦白金以彰其直顧公老矣願致事以歸乃進階榮祿大夫遙授平章政事給半俸以佚其老且命壻李嗣宗特授承直郎同知高唐州以侍養仁宗在東宮時知公歸特遣使賜幣命公卿設祖帳于都門外桷嘗以院屬侍公入議事堂鵠峙山立中外各改容以奉語簡意足不屑屑持辨爭丞相而

下皆傾動一日草詔書其語意難以入國語大臣疑之有集賢學士亦出微語公召掾史具紙筆請學士改撰學士大愧卻立會食畢公改爲之前詔一字不復用一坐大驚公以文墨自任不冝爲緊要官罷尙書省時世祖召入便殿諭以卿爲執政官何如公謝不能世祖曰知讓誠美事宜勿強成宗擇相召公密問曰左丞相缺孰可任以江浙行省左丞相某對益稱上意其陳于上者大較若是定孔子主祀賜孔林灑掃及祀田皆所建明興國學論廟樂所助爲多而其在憲府以敦本崇化爲先務當大德星變疏十九事皆切中弊壞成宗賜楮錢萬以優寵公受知成宗爲淡嘗問其所師承金玉幣器錫賚有加仁宗初政首



命名公以疾辭皇慶元年三月某日年七十有七薨其年五月葬于先塋之側公將薨時夢游祠宮有道士迎問公年口占一詩以答覺而言曰吾殆云逝矣世方倚公爲重而公不復少留可慨也矣其所爲文號靜軒集內外制集若干卷將傳于世桷由泰定元年得告歸里越明年公之壻奉直大夫南臺監察御史李嗣宗以書來海濱告曰子職在太史出處大致子侍承知爲詳隧碑未立願登其事于石以貽永遠桷踟躇莫辭謹按閻氏平陽人今居高唐州曾大父衍贈嘉議大夫大司農卿永安郡公諡懿德妣趙氏永安郡夫人祖和叔贈昭文館大學士資善大夫永安郡公諡昭獻妣武氏封永安郡夫人考忠故高唐主簿

贈銀青榮祿大夫大司徒永國公諡惠穆妣牛氏劉氏追封永國夫人娶尹氏趙氏李氏男一嗣慶以蔭授奉訓大夫廣平路威州知州未任以疾卒女一孫男二翁安翁壽女適卽御史君也公旣下世婦弟淮東宣慰使李處恭時爲吏部侍郎慨然曰吾寧使閻公終無以易名遂請于朝得贈光祿大夫大司徒上柱國永國公諡文康其姊亦封永國夫人而公三世亦以令典得追贈竝榮猗歟休哉銘曰

泰伯之曾食采於閻因邑爲氏慶源涓涓太原之閻顯武後唐戰多著名分茅爲王有孫曰象決科就文撫綏降邦拯其溺焚迢迢裔孫實家平陽試邑死事和川歸藏是生



惠穆占籍名郡推誠急施樂善不靳教子有行俾離其鄉  
業精行成何求不償顯允文康以文偉著執其牛耳莫或  
敢侮斟酌泰和密勿元氣英露喬雲萬物屢勗鎮于詞垣  
幾四十年矜彼不能擢才進賢維我世祖養茲國珍薦更  
三宗猶昔舊臣公歸白雲多士盡悼凡今日能亦公所造  
何以遠貽有豐其碑實茂聲宏播于銘詩

周瑞州神道碑銘

景定元二間賈相某隱城下盟罔宋帝理宗邀奇功外受  
強寇內括民業廷紳鉗舌奉風旨稍異議輒諷臺臣斥去  
小者歸田里大者入蠻瘴時則有豫章周公以史館檢閱  
入對曰李壇由山東來歸實急而求我區區一旅瞭然可

見借援無功彼敗我辱招釁之道梁武在位四十餘年卒  
墮其計陛下臨御日久不宜復蹈前轍父全逆叛著在信  
史已登告于祖廟壇乞改正正是作史者誣枉逆全行事淮  
東人猶能道此亦陛下在宥之所覩困獸投林誠不可使  
縱意干紊又曰臣近覩輔郡和市富室田業以備軍餉良  
以和糴廣造楮多楮多則楮益賤是誠不可不變通也今  
所在置司擇其上腴低直以酬又欲令賣田之主抱佃輸  
租歲或荒歉田主必當割他租以補他租既竭歸于耕夫  
耕夫逃亾歸于鄉役可謂獲近效而忌遠慮自漢以來納  
粟補官歷代循用輸粟既微補爵亦輕不足以動豪民臣  
宜以爲由尙書省樞密院吏員爲出身定品格立止法則



大家相胥以勸可以立辦粟可無糴楮可減造矣疏入相  
大怒言者急擊去而公風節言論著江表公諱應合字淳  
叟七歲授詩書通習大義年十七父如翼贈朝奉郎母胡  
氏贈安人相繼卽世逮事王父友賢以卓行稱宋寧宗朝  
嘗旌其閭書棣華扁以賜號爲棣華周氏嘗從棣華君至  
近郊望邑有火光亟返奉安人柩入祠堂袖神主以出王  
父奇之紹定四年詞賦應鄉書不中始悔曰吾安能事雕  
刻乃學春秋經結廬淡密揆微索幽從者益眾淳祐九年  
應試兩浙轉運司果冠諸生十年有旨試轉運司者入別  
院復在首選授江陵府府學教授待次歸里授生徒曲爲  
講說會歲饑首率鄉黨立三事一曰貸貧民二曰濟疾苦

三曰賑游末包公恢記曰是三者足補義社倉之未備十  
三年官江陵首講孟子曰壯者以暇日脩其孝弟忠信此  
凡民也士無一日而不脩士不當以壯幼論師友言行去  
其偏黨據會立要學者溪德之創鄉射齋申勵武備別立  
凡例以脩郡乘趙丞相葵雅知名會宣撫荆湖辟爲元寮  
以志書未成辭馬公光祖帥荆湖師援夔路俾爲屬主贊  
畫蜀事益急詔趣馬公援蜀馬公聽羣議不決公獨贊進  
師乃解開慶二年馬公帥沿江復佐江東兼長明道書院  
淳公嗣久絕詢諸池陽得五世孫偃孫以主奉粹二程遺  
語若干卷復以馬公命爲新金陵志自史館歸外補通判  
饒州後攝郡事決疑剖姦絕煩擾催督部使者爭薦之咸



淳三年主管華州雲臺觀四年通判寧國府其治如番而補其前逋復攝郡事大脩學宮除輸苗之不便於民復梅都官諸孫斥豪禁吏人不敢以犯湘帥汪公立信舊同寮奏辟通判潭州兼參議官丞相審治行目諸賢交章無虛歲亦欲俾出門下諭意長沙毋行公不可相聞益怒會江文忠公在相位以國子監簿進擬亟命御史李珣劾德祐元年登極恩復官是歲賈相兵敗走維揚起守寧國江西以瑞缺守辟知瑞州將治兵爲固圉計與帥議不合劾去素善訓子長子天驥年六歲敏記誦宋有童子科俾習之年十一以能文詞舉後登上第人取以爲法寔字合一天驥守吉州迎以養卻甘茹蔬感慨遁迹人不知太守爲

有父至元十七年卒年六十有八眉山程尙書公許嘗語曰君理義則濂溪章表似平園以溪園自號爲宜維周氏籍會稽唐以憲銜官鎮遏江州曰勅爲御史中丞銀青光祿大夫因家江州六世孫曰師教訓生徒里人稱曰一經居士又三世曰昌元妣胡氏是生棣華君子男四長卽天驥次天虎天鳳天龍女適朝奉郎經略參議官吳疇吉州教授劉明仲從仕郎潭州路湘陰令冷頤孫孫男十二志道某官志仁志德志學志義志立志遠志禮志行志敏志伊志崇曾孫男十六女二四世孫十有八五世孫三娶王氏繼萬氏俱封安人其葬在吉水縣同水鄉臻善里鷓鴣山之原天鳳幼歲入官熟昔時言行罔缺軼稱備翰苑屬



與之言論傾倒身履日接人則曰官簿不足恃久而曰彼  
兩家不可輕桷投絨歸里強使校文天鳳以泉州推官同  
在院未幾桷以喪子歸天鳳請銘銘曰

蹇蹇史君內剛以文察其要機叩于帝闕蒙恥冒功厥腥  
四聞我后不知惟相之云佐郡未幾輒劾以去冥心委順  
不懼伊沮山鏡野刻勤彼纂組謂宜掌制命則不遇教子  
有謨見其提符我實故臣逃空以娛叔也秉文庭誥靡渝  
詵詵者孫冠佩是似宦若不偶名則罔替昭銘松阡以告  
良史

有元故贈中憲大夫中書吏部侍郎騎都尉陳留  
郡伯郭公神道碑銘

大德十一年桷再入翰苑郭侯郁文卿時爲江浙行省都  
事獲締交焉見其受易學于侯先生得見尊公于庭下延  
祐五年文卿爲中書檢校余時直集賢來往益密而其尊  
公正席危坐凡辱交于文卿者咸執弟子禮嘗聆其言曰  
吾兒幸竊祿位不敢以自喜其所行事未嘗不察其指要  
而足以垂後者亦將以示吾子若孫居吾語子焉始兒以  
吏能及格爲掾都省定水縣門計功以便民民不敢謾而  
官費以省晉山荐饑且疾疫親歷其家去僞冒爲善藥以  
治得活者三千人爲宣徽都事行省都事句稽奉公增餼  
羊若干而浚役于松江者去其工直十有六萬石吾懼其  
瘠于民也民不以病是則吾之所淡喜也于時衛府調卒



萬五千至都城計其往復俾俱以九月集白于省大臣大臣許之至則器甲精銳士馬肅給爲諸省冠其餘稽工會程而不志苛刻於余諸孫良有望矣其在浮梁也迎余以養見其治學宮立鄉校廣弟子員知余後裔之必有以儒術顯者矣公之語於余者知其嗣必昌也公飲酒不亂道金朝遺老行事猶能反復感慨鄉人尊爲隱君是年八月卒于京師得年七十有六公諱天祐字祐之世居汴梁封丘縣呂村祖進考誠嘗職民千夫長娶林氏汴梁爲金遷都兵逼野處僑居大名大帥器之因以長千夫郭氏大墓數十兵亂蹂籍不可攷而新塚猶存三房審其爲大家明矣延祐六年八月某日葬于先塋郁爲浮梁州以大賚恩

進封奉政大夫知宜興州驍騎尉延祐七年郁授中順大夫知高郵府至治三年授中憲大夫同知兩浙都轉運鹽使司事泰定元年授亞中大夫僉江西湖東道肅政廉訪司事二年七月贈公中憲大夫中書吏部侍郎騎都尉陳畱郡伯未幾郁改授慶元路總管柄嘗以謂貴顯之及於親必原於遠祖親榮矣而考其若子之行事是猶望於後也自侍郎之無祿亞中公四歷要官柄略其治狀以侍郎之言爲可證豐功茂德見於去思誠不在是也配李氏累贈陳畱郡君公男四長亞中次迪嘗爲錢穀官厚海道運糧萬戶府百戶仁以黃陂主簿今爲江浙行省掾郁娶孫氏封陳畱郡君子三澍渥國子生壽蚤卒迪娶崔氏子三



厚娶崔氏子四仁娶孫氏亞中來乞銘銘曰

大梁之區厄爲兵墟層城鬱叢以薙以鋤維郭氏先歷有譜圖迢迢郭公在唐紫朱吏部有謙弗克以居以其先聞維訓菑畬味道養齡擊鮮以娛治官莅民考于庭趨大樸弗雕盛德莫踰維公有子克遵令謨述銘孔昭勿替勿渝

王氏先塋碑銘

延祐四年中書左丞王公出爲江浙省右丞將行天子遣使由上京傳旨曰毅其勿行七月拜中書省平章政事由是推恩如令式得贈其曾祖爲正奉大夫山東東西道宣慰使上護軍魯郡公妣周氏魯郡夫人於是平章拜命惕然有言曰維我祖蓄德閎華慶貽孫曾稚昧實蔑克稱天

子寵綏于臣子厥亦赫厚願敘先德以收合宗譜子職在太史爲我表而銘之稱謝不得辭謹按郡公名汜世家德州平原金將亾士族奔播南徙郡公有子全甫七歲隨從母走亳州稍長壻田氏由須城鄆城三徙後占籍汶上晚歲嘗謂子曰吾幼罹兵凶僅能記我考妣名字遺謀舊事不復省今祖墓在平原郭東北五十里曰水務鎮我死力不能歸葬若等毋忘平原也今以平章累贈資德大夫江浙等處行中書省右丞魯國公公二子長田玉次曰傑二女嫁張氏葛氏玉嘗一試吏輒謝去謙約無表襮策杖鄉社通慶弔煦煦無憊意今年八十有四以榮祿大夫河南江北等處行中書省平章政事柱國魯國公致政于家始



平章以詹事歸養魯公曰聖天子軫齒召至渥我雖耄尙善飯汝不效犬馬報居家何爲也又附詔使奏曰不佞老臣骸骨堅且強謹遣臣毅一心事陛下上大喜特授集賢學士資德大夫其配郭氏朱氏封魯郡夫人後以推恩進郡公訖封魯公魯公子三人長平章平章子思恭思齊思聖思誠思明次子謙謙子思禮思義幼子鼎鼎子思道思問曰傑魯公弟也子四人愿讓諒懋傑孫思正思進思忠思溫思益噫平原之墓由郡公得封今始有表焉郡公之若祖若父名字弗可考隆然兆域則皆在其上而諸孫之與平章同高祖者凡四房猶在平原居平章振興于百年之後因郡公之追榮合譜繫族俾五世之本支橫列旁附

將使之孝謹自將益昌其祖可謂厚也已銘曰  
昫昫平原土墳宅舒民用泰寧聿勤佃漁自河雲奔邑屋播逋有變者雛宵衣走途九折其行益南以趨由毫投汶靡定厥止稅于須城客鄆以俟復還于汶以鑄以耜望彼北河有隆坡陀企焉音容戰兢弗磨衡門之棲韜精養和曰我此有籍我墓伊何戒而孫子勿忘勿圯番番魯公樂道趾嫩允也魯公不銜以試藝而黍稷亦有魴鯉遨嬉大耄訖用燾祉篤生辨章爲國之梁夸毗弗師佩瑀秉璋諤諤蓋言百壬避剛始事東宮岌高偃讓告疾遄歸厥聲四揚魯公在堂曰汝來庭國恩靡效慎其寐興汝車疾驅我餽斯寧鴻化惟幾靖希隆平勿忿以媚勿喜以矜帝曰汝



嘉庸過南征乃晉平章袞衣具榮視品追秩三世是錫平原之塋松柏茂植維高維曾爰勗懿德寸雲敷功下土霈澤嬋媯祖芬肅爾承翼合宗別支秩秩毋紊瞻彼中林王氏之本匪祖曷思匪譜孰辨春秋墓門蟄蟄在巘紹聞象賢繩武以昌平章之心孝思不忘刻銘先塋久載用光

邢氏先塋碑銘

邢氏世居彰德安陽之交口村金亾大姓散走譜謀塚墓軼塞率高曾莫能考名字維邢由酒使君始著君諱植字子實幼隨父母竄處林谷親疫死從兄林歸里力樹藝自給厚德卑讓以先業奉其兄後居城中蓄善貨取贏頗以財自振尙義急賑兄無子訖盡力治生死每日齋用近禮

愛物近仁執信守常吾何慊焉坐肆中有客數人買縑於肆者罷肆縑有白金遺焉追客莫及明日客至君先授之客曰果有遺不意在君所誠大長者相謝以去庚戌歲大災郡蕭侯率民攜縷缶力用命不可滅至君舍乃反風侯敬禮之始以推擇爲酒使歲終第籍上府窶戶無所納乃悉以己財補輸之書券於君者毀不問後不冝仕鄉閭化之至元二十四年三月二十有二日以壽卒于家年九十有六初娶李氏繼楊氏李生子曰德裕字裕卿風度皎峻展君所行整暢爲儒吏擢本路錄事路隸某王分土俾復爲酒使至元四年銓選格行授將仕郎博州路錄事遷潞州判官再遷從仕郎陽翟縣尹又遷承事郎藁城縣尹其



涖博州調征南軍不使富民委役於貧潞州有疑獄立剖之而讞陽翟獄尤著民王氏有婢竊其簪珥酒壺以逃盜不可得詰誤相連坐乃密詢其素所往來或曰王氏姪誘婢他之度不可俱行因殺之以利財後卒獲其姪一訊輒引服縣人大驚爭持酒殺以賀在藁城會真定無極縣軍隊長匿戍卒鏹二萬五千緡詒言室中夜遇盜告于官三年不能獲捕盜官多受罪挾疑似坐獄者三十餘人府以白樞密院咸曰是能決陽翟疑獄者檄君以問入其室左右視驗實無有盜跡呼其孥二人別居之所對皆異辭遂直入其室發床下軍鏹咸在即日獄具而君以二十九年六月一日卒于官年六十有七初配王氏再配郭氏皆葬

于交口之祖塋有子五人長曰秉仁字仁甫曰秉義某官曰秉禮曰秉智某官曰秉信女四人皆適士族孫七人女孫七人仁甫始由憲司筮仕入掾臺省兩爲太醫院行省都事鐵冶正副提舉一再爲二千石治撫州興學禮士盜不敢入境治廣平亦以善理冤獄有能名郡民立去思碑以祝之今以嘉議大夫禮部尙書致仕于家而藁城君卒以尙書爲提舉時推恩得贈朝列大夫騎都尉河間郡伯王氏郭氏皆封河間郡太君尙書之長子溫字孟直更迭省部由御史徧歷中書左司官諳習故事而克謙慎脩以禮度自處今授亞中大夫大名路總管將之官致尙書公之命曰父子俱受朝廷殊遇列三品夙夜兢惕實爲先德



淳蓄再世以昌悞後人徒知邢氏之盛而莫知二祖之勗  
善培本者若是願刻諸墓上因子銘以昭示于後乃銘曰  
雲雷之交經綸靡寧上降下騰甲坼是承劬儉于躬不企  
其成蓄極斯泰奕奕振亨折獄揆情罔用口才嗇以裕眾  
茲惟艱哉維子維孫享其胚胎仰俯橋梓播美益培霜雨  
濡降永思彌虔詔而後昆絜其簋籩仕以飭身止以樂全  
過者必式茲爲邢氏厚德之阡

任氏先塋碑銘

青齊由尙父啟封土沃民阜擅魚鹽之利山水險阨雄偉  
冠鄰壤昔時宰輔願優逸自便者爭乞守是土勝概見於  
職方氏數千年盛矣劉豫猊父子背宋以千里赤子驅爲

兵徒犯順滅德金主悟其元惡傳旨就戮而青齊戶口物  
故過半完聚未幾李壇復懷逆抗拒齊部所領益莽爲墟  
落痛矣哉任姓世著滕州傳緒益遠有元帥府君諱杞以  
宏諱府君爲遠祖葬于薛河源宏有七子擢文武科墓碑  
燬落今由元帥府君始可譜府君娶王氏二子長曰銳金  
武舉進士終千夫長次曰釗字某某幼長戈革篤考古今  
成敗以進取自任鬱不得志持素所講習訓導鄉黨陳義  
抑惡片言總榮恥薰受以化咸曰絜任公所成就郡縣以  
其行舉于朝辟行軍總管再舉沂州臨沂令皆謝疾不就  
始由沂州歸于滕築室祖墓一日蔓火燎于野逼墓次公  
號泣伏墓所有頃火由它行郡嘗上其事府君曰吾得歸



故里守丘隴奚外慕焉美鬢善容侗儻以隱逸自傲至元二十四年九月六日年八十有一卒以孫貴贈樂安郡伯娶周氏贈樂安郡君三子長曰榮曰滋曰英榮由元帥府知事陞閩海道提刑按察司經歷以不樂入嶺嶠改授廬州嘉興總管府知事善心計仕泊如也以子貴贈某官樂安郡侯娶單氏贈樂安郡君生子四長曰居敬善吏事所至有能名爲建康般陽路總管今以通議大夫禮部尙書致仕娶王氏樂安郡夫人尙書子擇善承務郎樞密院都事執善江南諸道行御史臺譯從事女三孫三曾孫三曾孫女一曰居禮房娶李氏七子師善中政院管庫兼善泰寧路司獄思善蚤世明善進善悅善從善始學仕曰居仁

房居仁爲鷹房總管府經歷娶王氏馬氏志善適善達善宗善曰居義房娶丁氏伯善性善友善合子孫與曾孫四十一人郡伯次子曰滋房娶李氏生子四居安居信居寬居合孫與女二十一人郡伯季子曰英房四子居實居慶居厚居德合子女十人嗚呼由府君至于今凡五世通其譜幾百人世莫可儷豈非其孝感于鬼神蓄極以通故仕者振于朝而其未仕者各相勉思繩祖武以自顯匪表于墓則曷以彰盛德擇善淡湛雅思見事不苟與桷同備屬翰苑厚善而尙書亦屢瞻其儀度俾有述焉奚敢辭銘曰

滕薛之間任國首封傳於東都齒秩有崇禮食是問邈其



遺風泱泱三齊絲枲沃豐執智秉機厥俗攸同允也府君  
厄於兵艱閱詳興衰訓言閒閒左闔右塾化其悖姦隱身  
墓廬以號以攀仕不强希榮恥莫干雲藏靈淵磅礴蒼鬱  
朝躋于陵百谷瀾溢德盛莫居子孫秩秩聿來墓門展祀  
芬苾敘昭辨穆孝謹罔失

清容居士集卷第二十七

清容居士集卷第二十八

元 袁 桷 撰

墓誌銘

翰林學士嘉議大夫知制誥兼修國史趙公墓誌

代院  
銘  
長作

大德七年正月辛亥翰林學士趙公晦叔卒於官其年十  
月中書右丞相入對天子曰趙與票事世祖皇帝幾二十  
年事陛下亦將十年敦確清謹今既死無以歸骨于里敢  
奏以請於是天子命有司賻緡五千復給舟車傳費俾其  
喪歸將行孟實等以狀來請銘復往歲直翰林公爲待制  
其敘遷也亦相先後知公尤詳義不得辭方至元十四年



清容集卷二十一  
間公以驛來朝淡衣幅巾見世祖于上京冰澄玉瑩詞氣  
整朗言宋亾根本所在親切感動世祖傾屬自是入翰林  
爲待制爲直學士累遷爲眞學士公之爲侍講也言江南  
箕斂急督移括大姓宋世亾壘暴露皆大臣擅易書詔明  
旨又言庚寅歲大霧蔽塞正月甲辰虎來西城其徵爲下  
臣執權簸政言雖不行而公閉門待罪後司徒公俾同列  
諭意始復入署公每視職清望近思欲以言議質直理道  
確近條縷報上故所言嘗若剴切無隱而世祖皇帝沈幾  
先物神量莫測或爲公懼至平章政事不灰木公爲公奏  
私負歲積皇帝曰得非指故臣爲虎者宜官酬其逋別給  
廩粟布帛以養由是始知君臣相與脗合明著如是曾祖

伯洙宋朝議大夫知南外宗正事祖師雍宋朝議大夫直  
寶章閣考希聖宋宣教郎史館校勘高祖宗正某南遷時  
丞台州黃巖因家焉伯祖師淵與朱文公纂次通鑑綱目  
凡例微言奧語耳受身履故公所行尤近嘗與許公仲平  
論伊洛閩域首言力行致知清簡惟高沈默自祕皆東南  
極弊文以顯道捨是無以議許公淡然之至觀公待人愛  
士恩禮周洽不爲疏數翁訛其持家簡泊無復商榷計慮  
非淡知道者不能也天性孝友自宗正而下四世力請于  
朝而復其役贖姻黨男女爲奴而不能歸者凡十有一人  
始登宋辛未進士第爲鄂州教授由鄂來京師迄爲翰林  
學士知制誥同修國史積官至嘉議大夫年六十有二其



所成就不爲甚過而公以榮祿豐遇爲可愧不獲老田里  
爲可恨噫公之心如是而已矣初娶夫人舒氏不一歲卒  
歸橐中裝于婦翁不取今夫人史氏三男子孟實以公爲  
侍講時特官爲承事郎同知瑞安州事孟賚溫州路蒙古  
學教授孟貫將以廕入官以某年某月某日歸葬于黃巖  
塔山之原復嘗讀大雅文王之詩曰商之孫子其麗不億  
上帝旣命侯于周服侯服于周天命靡常殷士膚敏裸將  
于京以知文王之德之盛商士之恪謹溫遜篤承天心維  
我世祖明德造邦式混區夏內外小大共爲帝臣而公陟  
降左右承賚接錫終始若一至於不幸而死今天子復申  
命而寵綬之則公死猶無死也是宜銘銘曰

祿不斂羸謀不謀利我以其拙彼以其智衣敝策驚內燥  
玉雪誦聲清冷鏗出金鐵審審九關壬人殞魂維帝有訓  
四方于聞之身云亾之德不爽丘環麓茂一息以往繫畀  
之豐維時之通尙詔後人以封以崇

奉訓大夫昌平等處屯田總管贈亞中大夫永平  
路總管輕車都尉宣寧郡侯劉公墓誌銘

太祖皇帝沈幾整武蹙金踰南乃肇定中原物土萌蘖橫  
出迭變莫能稱上意將草芟而獸蒐之久而曰噫吾赤子  
也始料其民俾執藝丕作故家大姓爭占籍自詣遂得脫  
鋒鏑野處以居飭材辨器咸精其能而人益效用國以富  
強猗歟盛哉故昌平屯田總管劉侯之祖仁時爲金軍器



局副使治于汴至是率其屬徙北以行副使之考秉文家  
河南世儒族讀書通大義審金將亾兩河大饑家故饒傾  
所積以食餓者或曰歲荐饑宜善蓄以俟府君曰國迫民  
流旦夕當走守穀可乎守子孫可乎後副使由燕居宣德  
奉府君以養終葬于宣德爲祖域首焉副使隨軍而北也  
諸匠官所領道亾過半獨副使整部伍工作皆完繕帥大  
人奇勉之曰吾當入白上擢以美官卒俾見太宗皇帝授  
諸路人匠提舉後陞總管以終其配馬氏故涿郡馬令公  
之女孫男三人長伯英雲州判官季伯豪安平縣尹仲卽  
昌平君諱伯傑字巨卿習土俗騎射尤善諸部語言初從  
其父至大興見尹郭汝梅郭以能理劇知名善鑒識一見

卽命佐麾下使候賓館使者鞭帽駢集指畫不可辨能悉  
其語意周折省約使各慰謝以去尹益取自近壬子春憲  
宗獵溲州柳林尹日扈從治供頓一日上問尹近郊歲入  
州戶籍多寡尹愕謝莫對輒從旁具對甚習上喜顧侍臣  
曰是人宜爲官官寧有不能會供應官忤旨受誅乃授警  
巡院判官卽不避署事先白所司言京師號賈區奇貨善  
物可立致官減其直歲盡且不與雖百置市令無益卒如  
所白而官取需始輯秩滿府咸曰捨劉君孰使遷本院副  
使再遷院使厯院四曰大興宛平易縣樂陵循撫慰煦倉  
卒泛索不假氣色卒不使煩擾事益以理古言京師號難  
治若內縣得一善滿輒蹈足以去君所爲官凡七遷皆畿



赤繁職使忤貴近一斤不復上驅民迎合將促數苛擾曷  
得更取迭用以自顯若是則其治狀可無愧矣其治樂陵  
也鷹房數百人從旁縣來糗肉滿馬尾意樂陵可稱意讀  
令諭之召其首曰使果犯誠不貲汝卒避去推樂陵所爲  
政其治它縣與府院蓋可知也後爲昌平路屯田總管積  
官至奉訓大夫卒以至元二十三年四月某日年六十有  
五其葬在大興縣招賢鄉烽臺村之原男六安易縣尉蚤  
世弼監太倉支納致事裕宗皇帝年勞補官積遷中大夫  
建康路總管府事佐承務郎同知涇州事敏從仕郎涇州  
判官敬承事郎藏珍庫使女三長適幽州賀進次適承務  
郎尚舍監丞蕭某次適嵩州判官田從義孫男九可大將

仕郎同知馬籠州事可久蚤世可浩崇祥院尙印可任幼  
侍東宮進義校尉行篋司藥局副使可復可真國子生餘  
尙幼孫女五長適安平王某次適幽州郭炫保定于傑幽  
州朱棟蔚州宋某延祐中贈典行致官三品得贈二代始  
追封亞中大夫永平路總管輕車都尉宣寧郡侯夫人宋  
氏宣寧郡夫人而祖父亦贈中順大夫宣德府知府驍騎  
尉宣寧郡伯配某氏宣寧郡君桷往與太常博士楊君宗  
瑞游過其塾見劉氏諸孫齊襟受經雍穆有度而建康公  
禮法自持未老倦游肅然以門戶訓勉今觀博士行述儒  
素之積實由河南來禮不忘其本遭時熙明將於是乎振  
遂不讓而爲銘銘曰



魏巍元后成元功鋌戈誕指中州從麀驚鼠竄毫與童土  
金石木獸草工各飭攸職程作供徒彼儒族漸勁雄敕甲  
奉貢朝紫宮語言清琅續耳聰指掌代對剖臆胷天府赤  
縣更選庸貴瘖獷伏氓容容游刃不缺至理通大椿靈根  
壤墳豐美蔭蔽芾宏闕崇鑿銘堅珉德彌隆

將仕佐郎信州路儒學教授陳君墓誌銘

大德丁未余供奉翰林與廣信陳志仲游粹然以容慎密  
不妄言間語昔時祖子孫家慶故事志仲莞爾言曰吾大  
父迪功君大母程夫人罹兵難時年七十餘我嚴君衛鄉  
保入侍二老人嬉戲盟饋奉禮如昔迪功君年愈高別築  
華山梅堂以奉益不復知有世事于時諸孫實五世矣迪

功君號南隱翁翁終時年九十有四方南隱翁無恙時諸  
父皆逝唯吾老人力整門戶訓兄弟子後以儒術興者凡  
若干人幸爲我記華山焉己酉歲秩滿南歸余師剡源戴  
先生教授信州亦還言廣信多郡博士獨陳博士溫讓材  
智篤素慎行爲第一方有司急庸調徵儒生幾二千人能  
力言而盡復其役汝官京師有名敏學字志仲者其子也  
與之游乎未幾志仲以信州教授致仕命歸榮其親後爲  
宮師府司經典籍稍遷太常畱錢塘遇之則又曰吾親年  
七十時嘗爲書授敏學曰年至而仕非古也壯者必仕仕  
不求祿養吾視大父年不敢跂幸氣血康完若二兄恂恂  
善持家勉若以仕勿懼也皇慶癸丑余復入史館志仲則



以太常舉將爲博士冬十有一月訃至凡所與游者皆入  
弔越三日凶服踵門泣不能言以國子博士虞集之狀授  
梅俾爲銘君諱萬里字德甫弋陽縣人幼善屬文長從工  
部侍郎諱公禾學詞章起居郎徐公直方受理學謝公枋  
得張公卿弼植志節咸淳癸酉薦于鄉後起家廣信書院  
大修燕居堂面帶湖立諸生論古今成敗道理遺言微旨  
文質益損皆口授手畫諸生不忍去請于官畱帶湖凡十  
年南隱翁卒學者咸會葬焉雅性寬厚善清言與人交久  
而彌篤歎歲疾札發粟施藥以全活家多書讐證成善本  
謂諸子孫天佚吾老吾遺爾書守儒爲準守身爲本餘何  
言哉壯歲慨然慕詞學故於章啟語尤精噫方宋文治時

立博學宏詞科番陽三洪公周文忠公迄致清顯至呂成  
公眞文忠公闡正學彌貴重眞傳諸徐鳳徐鳳傳諸尙書  
王公應麟公曰中是科者實有命晚歲問難無以承諸生  
徒自辱爾梅聞是語愧汗累日今幸與志仲交意謂從廣  
信山中論竟斯道今不可得矣屬纊之日戒勿用浮屠事  
實以九月某日卒得年七十有六以某月某日將葬于永  
年鄉之吉田曾祖謙道祖應隆考文光卽迪功君也長子  
誼次天驥皆爲郡學官先娶程氏出次敏學將仕郎太常  
太祝今方氏出女三長適方晟次徐某次方天祐孫男七  
人長師中第五孫宏爲大都路儒學錄孫女五人曾孫女  
二人梅嘗謂士患不得名巖居谷隱一時推可多任俠尙



滄容集卷二十六  
輕重若先生者休然養名平進安時鄉閭化之郡縣企之  
孫曾承之歿有餘德古所謂鄉先生者陳氏之門見之矣  
是宜爲銘銘曰

日劬其躬以濬其逢不逢樂天脩齡以終帶湖之徒來會  
幽宮彼列者泉樹之青松而子而孫慎其延宏式昭墓門  
百祀弗窮

陳士直墓誌銘

咸淳三年浙西提點刑獄戶部陳公卒大臣以公清直挺  
著特官其子嵩伯是曰貴白甫有子命名長曰紹廉季曰  
紹庭廉言清庭言直也壬午歲余過奉化入其里居拜戶  
部夫人于堂下退揖貴白甫于賓次識二子焉其季紺頂

斑襦眉目刻成煜然碧光流几席稍長羣諸生誦聲琅圓  
端默絕外嗜又十年貴白甫居徙江滸復入城僑館則季  
已加冠字曰士直神益完貌益整肅客侍立無倚怠退具  
醪茗動中周折不復俟指顧間從士直坐書室鉛黃森錯  
卷帙整束受業退暇琴清筆潤花竹手植如幢列人咸曰  
誠有子桷則曰是宜壽且傳噫世胄彫繭夸者馳侈靡卑  
者淪頽仆幼儀雅言耳目不相接垂三十年脫有能自樹  
植皆野人窶子椎魯不入繩墨獨士直以故家兒接受薰  
熟而貴白甫身教簡易故人皆愛士直靜且和足以蔚其  
宗余亦愛士直將挈而充之使益有令聞大德丁未余官  
禁林有言士直遵海東游京師遲之不復至己酉歸里貴



白甫泣且言曰吾紹庭甫壯以九月某日亡矣其死也遺  
筆敘訣無怛語獨屬兄置後以慰父母明年春兄果得男  
曰鑄配汪氏遂育以成其言葬地在宅西嶼山以辛亥十  
有二月某日窆俾桷銘謹按官譜曾祖諱某宣義郎致仕  
贈朝散郎祖諱肖孫朝奉大夫戶部郎中浙西提點刑獄  
嗟夫世患不能持身旣壯且脩振衣康莊御轡遠騁其進  
莫可止輪揉輓敗卒歸于命貴白甫秉德師古迄逢不淑  
莫紓其悲以貌期稱余復失之天乎是果不可知也庸銘  
以慰而翁銘曰  
有燬者珠復沈于淵云誰尸之蒼蒼維天雲乘嶼山兆食  
歸復詔而兒子以衍以續

戴先生墓誌銘

先生諱表元字帥初一字曾伯世爲慶元奉化州人七歲  
學古詩文多奇語年十三卽加冠入鄉校從里師習詞賦  
輒棄不習學諸父強之乃游臨安于時新定方尙書逢辰  
廬陵劉博士辰翁以論策表厲進士得先生程文大奇之  
咸淳己巳入太學改歲以三舍法升內舍生又踰年辛未  
試禮部第十人登進士乙科授建康府教授越乙亥歲由  
建康歸遷臨安府教授行戶部掌故皆不就積階至文林  
郎大德甲辰先生年六十一矣會執政薦于朝起家拜信  
州教授秩滿授婺州以疾辭至大庚戌三月卒享年六十  
有七先生在建康時先處州通守是邦朝夕互還往先生



眉目爛聳慷慨自奮欲以言語筆札爲己任嘗曰科舉取士弊不復可改幸得仕矣宜濯然自異斯可也後二年失仕歸剡遂俾梅事先生始盡棄聲律文字力言後宋百五十餘年理學興而文藝絕永嘉之學志非不勤也挈之而不至其失也萎江西諸賢力肆于辭斷章近語雜然陳列體益新而變日多故言浩漫者蕩而倨極援證者廣而顛俳諧之詞獲絕于近世而一切直致棄壞繩墨焚爛不可舉文不在茲其何以垂後先生淡憫焉方是時禮部尙書王公應麟天台舒公岳祥師表一代先生獨執子弟禮寸聞隻語悉囿以爲文其文清淡整雅蓄而始發間事摹畫而隅角不露施於人者多尤自祕重不妄許與晚歲翰林

集賢以修撰博士二職薦論而先生不可復出矣維先子與先生總角相厚善暨先生登進士年盛氣邁故舊貶抑者不敢自進先子正色相輔復以不肖孤托于先生誘之迪之獲不失其身往歲解官南歸於是先子捐館踰一紀矣先生始愴然曰先公之德幸勿墜嗚呼朋友道喪久矣過時而哀梅實何敢忘自昔孔門首分四科歷代之士率不能兼有尊德行者後文學世嘗病焉先生爲文尤多於忠厚孝悌之語後之纂言者其必有所考夫文以蘄遠果能遠矣而近者五六十一年或止百餘年其不幸者又皆爲水火燬沒亾紀使誠盡傳也則世有能名者不一二數然視今世焯焯所傳又皆無是事噫傳與朽始固不論也會



祖辛妣劉氏祖汝明妣鄭氏考灝妣王氏世多儒科伯祖  
杰端平初爲宗學諭篤厚爲時輩所尊先生詩文若干卷  
疾革猶手加繕定以所居鄉名曰剡源集治窆張村葬以  
至大元年三月某日娶陸氏子男四初陽次紀後庚幼儒  
女四壻曰陸孟孫孫肖翁徐公說袁庚孫孫男女八始先  
生兩授徒于鄞于宣于杭其徒散處莫會初陽等謂從學  
最久而知吾父者宜莫如梅遂俾誌其墓乃泣對不敢辭  
銘曰

桓桓戴系立氏以謚信都九江集禮秉衛在漢國鈞守正  
忠毅別籍于剡貞德彌勵琅然孤桐不詖其逢浩歸衡門  
邈焉冥鴻二季重輝續其高風箋經暢隱雅言春容厥壤  
犬牙旁邑是著方門之支本茂葉附展世斯赫宗賢攸輔  
說說餘慶聿踵先武振聲鋪華先生是承有煜者光不竦  
不凌在泮峩冠掩耳以行曲裾長襜祇繫其亨千塗競譌  
一轍交走正岐前驅白首莫疚發其粹精如瘖脫口如轡  
在手如藥在肘屢躋于艱秉禮益閒有泉潺潺有佩珊珊  
駕言東游曰知者天卒昌其文以終丘樊張原之柏先生  
手植彼高爲南彼鬱者北告而嗣子以順以則昭銘墓門  
過者必式

周隱君墓誌銘

先王盛時以三物教民六行之不脩則設刑以糾之是六  
者切於人道之日用故嚴以爲之防其理然也降於戰國



彞倫益敦孝友著於列傳擁強贊持短長縱恣郡國作史者復傳其事豈誠有激於世乎納粟之令行虛文益張實不見於鄉黨執筆以揚人之美不僞則佞吁可懼也矣廬陵曾君異申與梅同在翰林狀其姻家周隱君之行曰君諱天錫字極翁吉安路安福州人曾大父大成大父宗元平實自持以累舉恩授迪功郎臨江軍新喻縣丞兄九鼎篤信行歲饑能損粟直以售遇朋友急厄傾貲解援裕如也牟內翰林領史事將薦以自近後不果文丞相信公靳許可扁其齋居曰信太學博士劉君辰翁實銘之是生隱君嘗以詞賦上轉運所江丞相讀其文奇之事親盡孝侍疾治喪悉如禮以遵父志其待於族姻洽於鄉鄰者彌有廣

焉性不事表襮勸之仕謝曰吾求全吾初遂因以自號至元二十九年十一月年五十有二以卒娶蕭氏男長孺將仕郎征東等處儒學提舉孫男三福祺禎孫女四延祐五年四月甲辰葬柏溪之橫原讀其狀則知夫厚德之延非一世繼志紹聞久而彌光泉蹇於山木生於地磅礴鬱積有自來矣君之遠祖廣爲南唐節度押衙積憲銜爲御史階金紫唐廣明以來有是官曾君平居語不妄孫禎曾壻也曾之先君監察御史縣桂陽時爲湖南主文實拔君爲首選事可證若是銘曰  
有錦綉之有玉匱之蓄兮續之是用穀之廬陵之原豐碑秩秩昭其幽光詞不以溢



清容集卷二十八  
楊府君墓誌銘

江南官簿大家運統合一緒墜牒散流降不復可考或者謂聲聞詭激德不稱名馴致是理味其語淵乎有旨哉箕疇敘五福首次以富終之以考終命而祿位弗敘若是則尸祿位者私善惡喜怒鉤名挈譽幸終其身其禍可勝道哉至治元年余校文南宮得一士曰張純仁廣信人也調鄞縣丞鄞爲余里會謁告歸純仁踵門以其舅氏之狀請銘其受氏爲武夷楊氏楊由侍讀學士徽之翰林學士億顯後有徙信之弋陽今爲弋陽人其曾祖諱崧祖元龍考汝翼妣三世曰李氏程氏江氏考能詩有集曰醉吟李君明通敘之君名謙之字謙叔嘗監麻沙鎮後不復仕其所

從師曰謝公君直純仁之祖教授君某其事親有誣其考以重罪君總角詣庭直其冤其居室銖黍充剋使善裕其施于鄉損粟直以濟饑買田以助縣庠其宅南有重巖水石君能專美獨樂之其娶熊氏閩助迄成其家子三長昭德次拱辰先卒季進德孫男九孫女六曾孫一其生在寶祐丙辰卒以泰定元年正月某日年六十有九其葬在武石山噫所謂五福斯備者歟其自號曰謙山名字與號若不相捨茲其爲延永也大矣是宜銘銘曰  
世以祿夸我弗企之積小以高莫或躋之峩峩長松美蔭日疏迄樂其全弗僭弗踰武石之山固爾體魄爰廣墓門過者是式



劉隱君墓誌銘

五經之學由宋諸儒先緝續統緒詩首蘇轍成鄭樵易首  
王洙東萊呂祖謙氏後始定十二篇胡宏氏辨周官余廷  
椿乃漸次第書有古文今文陳振孫掇拾援據確然明白  
言傳心者猶依違不敢置論至天台劉君正仲諱莊孫始  
憤然曰吾不能接響相附和尊聞紹言各爲論著不沒其  
實而先儒之傳益顯所爲書曰易志一十卷詩傳音指補  
二十卷書傳上下篇二十卷周官集傳二十卷春秋本義  
二十卷其論春秋爲魯史之舊是則發揚先儒之遺旨喜  
著書能以詞藻達幽隱復爲論語章指老子發微楚辭補  
註音釋淡衣考而其所爲詩文曰芳潤藁凡五十卷和陶

詩一卷噫多矣哉學患不博博矣其必不能有以精也士  
生于今會眾以合一由谷而之川川以達于海蓋其書具  
在獵英聚珍朝成夕上敏而求之者良不以爲艱是則於  
劉君見之君少學古文湛深隱伏不見其涯涘落筆數百  
語詩工次和愈作愈平順而幽愁感歎思其平昔狀其羈  
窘鑒燭清澈物莫有逃遁者性嗜酒不解治生業幼侍其  
父府君昇自爲師弟子從闔風舒先生岳祥游唱和不輟  
空林絕嶂目接耳受一寓於諷詠晚歲先會稽郡公延入  
塾教諸甥桷相與論經旨往復不避輩行蓋君篤信周官  
而不鄙每置議君亦不以爲忤在太學五年不善爲同輩  
文字不獲釋褐今其所爲書先師尙書王公總而敘之大



德六年十二月某日卒年六十有九娶王氏後七年卒子  
三長主一早天次存翁學翁女一適董可傳葬于士奧之  
龜峯劉爲寧海儒族八世祖世充爲吳越王錢氏板授官  
閩風里有二劉曰和叔曰允叔於君爲曾叔祖有文名不  
大光顯至君父子亦若是今遺書具在詎果無傳也邪曾  
祖某祖某妣某氏其子存翁嘗請銘以久官翰林不克爲  
至是二十有四年矣今復有請愀然謝曰隱君振華續光  
將大有傳者舊漸盡桷敢不自勵銘曰  
揆微證陞前哲功後學剽襲誣顯蒙偉哉卓識合異同輪  
困卷帙浩不窮冥揆元象歌颯颯弄筆爲戲箋魚蟲辟雍  
三黜命莫逢紀述有在蓄極通墓門永揭昭儒宗

曹士宏墓誌銘

褒貶論春秋解經者失之作史者祖之則益失其旨矣宋  
祚歷三百餘年經國之綱領治迹之盛衰實書以示後其  
義自見淡文巧避多出其子孫而爲國諱者掩而益彰沿  
襲不決何以傳信吾友曹士宏甫淡憂之蒐摭遺逸不瞽  
於昔時之議論自成一家其貫穿出入年經月緯誅其私  
心附以旁證莫能逃遁桷往歲亦嘗以是自任故書燬廢  
不復敢因微言曰帝在房陵豈乾侯之例邪外大夫不書  
卒書卒者其是邪士宏甫撫掌大以愚言爲然嘗約吾二  
人當必任是事嗚呼士宏甫今往矣以余之識闇志荒不  
復能有成矣士宏甫讀書目過卽成誦理財養兵禮樂刑



政之損益折衷於古經而以通今所宜行者爲之準其見於用也不卑於簿領而志足以展用取於友也盡其所長覆護以捨短故舉世一皆以爲賢奉親孝事兄以恭訓諸生專席廣說耳領心會爭踵門受業後卒致顯仕初爲郡史燕公公楠爲大司農辟以自近歷婺州純孝慶元丈亭廣德陳揚村杭村巡檢後入銓曹復授陳揚村揚村父老咸曰是嘗攝吾里者矣曹君善撫字今年饑必賑我我何之君諱毅武惠王裔孫五世祖某從隆祐太后避兵過廬陵因家焉曾祖某祖某父某有詩集六卷祖妣鄒氏妣羅氏鄒氏以叔父某太學釋褐恩封孺人所爲文若干卷纂言行編曰鈞元凡五十六卷疾革命諸子曰必返汝祖母

故塋吾魂氣無不之得地卽埋我卒以至大三年四月某日年五十有二子男五人汝霖今爲兩浙轉運司書吏汝舟饒州器資宣州皆以秀才舉馳以醫業入仕幼桐孫女一適劉某先卒孫男女七嗚呼人嘗恨位卑齷齪媚上甚則策功利以求進名在罪籍不自悔王公貴人持與奪生殺身死無足稱道較士宏所負所傳得失爲何如也先師禮部尙書王公應麟爲文餞之曰闕里高第冉有用矛樊遲爲右士宏爲此官文武同方之道也侍講學士張公伯淳則曰伯淳官慶元士宏在慈溪與之友不敢吏朱雲也汝霖汝舟皆能世其學泰定二年汝舟以書抵余求銘實不敢辭銘曰



匏也不食我心孔悲聿求王明以策以馳輪困知聞如山  
簇雲纂史闡名不屑於文緝墜紹緒執筆是紀年不稱德  
傳世則偉作銘允哀以詔我同志

陳縣尉墓誌銘

咸淳閱十禩諸縣獨奉化號多士流出入太學上南宮  
慮十餘人于時蜚聲秀穎旁縣皆斂手避讓一時傳誦習  
讀謂清選不歲月可馴致未幾皇元合一皆失仕歸里挾  
策授徒疎糲自給俱不能享中壽子弟不自振飭復歸爲  
農陳君亦咸淳甲戌進士不自矜襮接幼待賤謙挹愈加  
混跡蒿翳不知其爲故官而得年且八十有一有子漢復  
能以儒自守其視前數公良負過矣君諱觀字國秀嘗調

臨安府新城縣尉十世祖棠尉奉化因占籍焉子孫日蕃  
其最顯者曰太學博士著於君爲兄博士倅貳臨安君館  
于其家君之考承務亦在館旣策名客館其兄復賀其父  
人咸榮之晚歲足不入城府州爭迎致率諸生以請業君  
一至卽謝去徜徉巖壑侍博士窮幽抉奇連唱屬和有帙  
曰棣萼集其自爲詩文曰竅蚓集嵩里集延祐五年三月  
疾忽作猶力書中庸一章以授漢是月某日卒祖諱某妣  
戴氏以守節著事見州志考某承務郎妣臧氏董氏孫男  
二時說時敏孫女一已嫁次未行今葬剡源鄉畢駐里祔  
于曾祖迪功某之兆銘曰

日垂崦嵫亦旣見斗實命不逢怨則屢疾布衣便便迄享



大年執其韋編戒子于傳維陳令族詩書是續作銘昭昭以告必復

靜清處士史君墓誌銘

大德七年梅官翰林史先生以書見貽不獲領後二十年子壁孫橐其書藁以示反復痛悼策勵于梅爲甚重今撮要而表之曰斯文剝喪餘數十年師表郡縣學者應格則得未嘗于其人後生不說學亦未嘗知學別僞務實而挽之古子宜勉焉非可以虛談冀也又曰吾將死得子文表于墓稱拜手讀之泣然以泣先生於外家爲舅氏猶記拜先生於獨善坊論宦族纒屬文詞顯著獨缺自吳丞相開新河有相者曰邇後當踵有之甥宜自重先生於諸經窮

揆微旨證墜緝缺不溺於謾聞剖釋正大而折衷一歸於前哲論古今得失必揆情僞以暴其罪正色憤悱若造庭而受其責也爲文邃古不雜異說手抄口講更僕不能以盡孝悌遜讓知其出自自然也先生諱蒙卿字景正生而奇頷秀目七歲善屬文年十二入國子學通春秋周官經復兼詞賦江文忠公萬里常參政挺時爲大小司成器待之咸淳元年登進士第授迪功郎復州景陵縣主簿呂少保文德帥鄂檄入幕呂命先生勉蜀帥溫和解正陽圍溫疑呂猜阻不肯發微語撼之卽就道凡所需器物一夕以辦溫實先公帳下校卻立曰史監軍誠有子調穿山鹽場論義勸輸戶不知有箠榷十年改江陰教授復改平江至是



不復仕故其詩文多感憤自喻禮部尙書王公應麟嘗勉  
曰思淡辭悲學陶靖節其得之維鄞史族號相門曾祖諱  
法蚤天贈中散大夫祖諱彌鞏司封郎中贈少師司封以  
儒學致顯當貴盛時獨卑退自持鄉人稱爲獨善先生妣  
臧氏華國夫人考諱冑之中大夫湖北提刑兼知常德府  
贈太中大夫妣趙氏周氏碩人太中熟邊事折衝料變有  
大帥才時宰尼之太中在湖北時謁告歸省從巴川陽公  
留學易春秋一年復歸國學乃中上第士常患固陋株守  
皓首不寤先生識足以窺淵懿經緯一原合師友之旨老  
而彌實確而不懈故其成就若是自號靜清晚歲罹厄窮  
講道不輟從者益眾天台多名山心樂之僑居者八年大

德十年七月某日卒享年六十疾漸革語諸子曰我死必  
歸葬不能得資良累汝汝有志其果能成也是歲十有一  
月柩歸祖墓明年葬于陽堂鄉穆輿之原娶陸氏朝請大  
夫將作監合之女子璧孫堃孫堃孫堃孫堃孫堃孫堃孫堃  
公夢鼎之孫揆翁仲忱適紹興中書舍人潘公良貴之曾  
孫世演二女未行有文集二十卷易究一十卷託永遠於  
少賤誠不敢承命歲月逾邁而璧孫能遵守不貳奉遺言  
以請曷敢以不腆爲辭銘曰  
貞絮陸沈志裂金石秉言無郵厄則孰職驥伏于襄不稱  
其德塊獨結約忿決胷臆持九障瀾盡瘁不休卒昌者名  
屢空靡憂生爲完人歸藏于土有子紹學曷怨以尤



清容居士集卷第二十八

清容居士集卷第二十九

元 袁 桷 撰

墓誌銘

浦經歷墓誌銘

大德丙午桷與吳郡浦源如淵同佐史局史局總翰林職  
 清簡屬筆將既輒羣坐臧否今古如淵呐不出口一日正  
 襟瞪目援酌是否纏纏數百語經史綜錯淡切治道且曰  
 吾家君重然諾慷慨子歸且往見是歲還吳始納謁焉見  
 其設席尋丈車履沓戶限茗絕觴舉輒口數州郡靡傲事  
 傾耳點首皆僑寓達官奇其言將引以為他日助未幾授  
 漕運府知事朝貴人俾乘驛來京師昌言漕計十數事不



便朝從其言卽陞爲經歷壬子歲柄留吳最久遂益得奉  
議論痛言田稅民役上下交困乏將繕治其說於素所傾  
密者于時以婉語止之曰害不什一除旁出苛擾殆將重  
病之君立悟乃止後授黃州錄事判官延祐乙卯君年六  
十一矣嘗謂知己多行事少平時措念挺挺可表著迄莫  
能自見一有委使排根抉蠹將欣然盡瘁方受檄推考而  
卒以疾至大故實四月庚午也嗚呼成周以三物教萬民  
降于司馬遷憤世嫉邪獨致意任俠君周於事物激不近  
刻任重致遠出戶而日昃噫幸歟其不幸歟浦爲吳郡著  
姓君諱椿字 世家崑山州曾大父某大父某植德潛  
闕父某貧而好施君少試吏以曲直視事不可有高下簡

易絕城府解排糾微磊落輒自許壯歲恥同凡輩始辟漕  
運府史熟其利害府薦于朝爲照磨三遷爲府經歷晚授  
黃州而志意莫遂詎命也夫娶陳氏男五長源以編脩官  
授承事郎常熟州判官次厚與陳夫人先七歲卒次湜浩  
津女嫁同里嚴震孫男五孫女二六月乙酉葬長洲縣陳  
塋之原銘曰

璞隱于荆彼士泣之驥伏于車曷予繫之成者匪天爲者  
匪人不成不爲其風肫肫聿昌其始有子文偉高丘永安  
是謂受祉

司天管句焦君墓誌銘

長安焦氏世遠軼莫究宗譜有諱紹先者金汰武時始著



進士籍生子繼祖爲河南招討使招討生餘慶第詞賦科  
仕至中順大夫雲陽縣令金將亾國勢蹙憤日挈都南徙  
達官重族棄播不自保雲陽號儒家乃讀建除候占等書  
察便利生死法爲隱避計死未幾有子曰永字某益究術  
自祕天兵下陝率里閭孥屬二百九人道金洋入蜀門蜀  
附定悉完聚歸後家岐陽遂以術顯靈臺因官焉至元庚  
辰靈臺卒年六十有八男二榮陝西四川陰陽提舉顯廣  
元路歸興倉使女一適輔某孫男四澤臨洮府稅務大使  
漑將仕郎同知益良州事渥岳州路陰陽教授沈延安路  
陰陽教授其葬在咸寧縣龍首鄉南岡合配胡氏祔大德  
丁未孫沈奉集賢宋公所爲先塋碑與靈臺君之事狀謁

某京師且曰吾祖不顯于儒躬遭險艱食藝保緒晚歲聚  
經史揆玩意若有俟性溫重無忤色紛難急乏力盡不瘁  
諸父兄嶄然自持承芬振華挈挈自厲匪我祖先德疇克  
有賴敢以是乞銘銘曰

起儒維曾逃艱以承魄藏止止昭爾孫子俾復其始

滕縣尉徐君墓誌銘

君諱之綱字漢臣金以詞賦舉進士君爲詞賦大有能名  
會金將亾不得試作賦說以示學者窮幽闡微合金宋體  
指摘昔人鉅作嶮然不少讓上論隋唐曲盡幽眇久而曰  
是果爲學邪益揆道理以河南二程江南朱張胡蔡爲根  
柢窮春秋易二經其言春秋失始三傳左氏誣爲甚常事



不書聖人之旨也易更三聖麻衣誠偽書夫子十翼功竝  
日月其言與朱文公合當是時南北蓋未混也意識卓絕  
尙友於千載其言論金士疑之宋號以儒立國論亦如君  
言其所爲書東齋默志三卷皆經說也通融賦說三卷舉  
子學也麟臺雜著七卷其所爲詩文也皇元略中原定地  
戊戌歲始招輯儒士君以明經選益都于時李壇以諸侯  
兵分省君以府學教授佐省事壇喜儒間問攻戰成敗陰  
蓄甲士習勞苦君講經曰使民以時相君不知也壇默然  
又曰平王威烈周之衰也戰國之士知諸侯而不尊周唐  
世河北將士尊藩鎮而不知有唐其言簡直遂黜爲滕州  
滕縣尉讒者復以默誌羅君禍後壇果就誅而君亦已下

世中統四年八月某日也年七十有五配李氏郭氏嗚呼  
崎嶇兵塵士悉以童習自守磅礴河漢橫流塞而天源淡  
非君其誰邪淄川楊公序其文矣君世家單州後徙濟州  
祖鐸父革俱金進士配翟氏子敬至元十三年中明經無  
祿卽世孫天麟十七年亦中明經次鳳以積勞爲益都路  
臨朐縣尹今承務郎慶元路總管府經歷次士龍代州儒  
學正曾孫若干人鳳靖共宜官愀然言曰祖父節行經學  
先哲推重子嘗爲文字官願誌墓道遂讀其所爲書以敘  
乃爲銘銘曰

魯聖絕學蕪榛菅曲說恣臆紛翩翻浮聲急響曼以繁青  
紫決拾靡覲顏夫子勇志開冥頑手持寸膠清渾瀾雲陰



駁霽白日還佐鎮陳誼數斥姦拂衣避席彼構讒寥寥道  
統孰異分正轍前趨南北貫厥功茂著儒碩先遺文傳信  
銘永刊

龍興路司獄潘君墓誌銘

元貞元年柄掌呂成公麗澤祠于時壽俊有數公能言乾  
道淳熙遺事嘗曰麗澤選不輕二潘君真名士子繼二潘  
亦僅僅焉大潘君吾里人以介直忿世死小潘君弼良輔  
處之麗水人介亦相近氣邁年盛用世必得善譽子善識  
之未幾良輔來金華望之魁偉壁立瞪目拱手廣席參錯  
未始出半語稍論古事輒躍然纒屬穿貫握手曰大潘君  
死吾與子真交承矣後游京師授贛州教授見中丞崔公

議論剴發相感動關絡解別不爲翕翕附中丞喜聞四方  
利病卽奏授廣東廉訪司管句架閣兼照磨是後余亦入  
爲太史屬臺使者旁午入奏事咸言良輔有御史才廣東  
副元帥囊橐峒寇稍廉察卽縱寇搖動斂手弗敢問遂悉  
發其姦蠲德慶路官逋糧三萬石劾具幕長不法數事聞  
于臺立罷之監司欽察公悉付以事副帥益鬱怒誘引匹  
賴誣讎會省臺停其職而以君劾罷者復所居官未幾御  
史言論劾者罪著不宜復然君卒以是去江南行臺御史  
列署薦君宜久任憲職于時崔公已卽世不復任君矣大  
德十年復爲贛州教授以昔之治廣者爲準闢田築宮訓  
士嚴整力請于官而復其役皇慶二年授龍興路司獄不



卑其職悉疏宜行者以盡心焉部使者佟公憲府舊屬命  
治佐劄專利者凡得八百人悉除去之會佟公去官不逞  
復以他事相誣誤強訴者引君然君自是抑氣不能食以  
死嗟夫士患不得名名與謗常角立味味後福善不近名  
誠有爲而言也若是者君幾近之矣君族祖父曰叔豹曰  
杞世儒科皆至二千石曾祖恕樂道不仕大父屋太學進  
士脩職郎平江府吳江縣丞父應發薦于鄉文行瑰偉士  
尊稱之君幼孤母項氏招師教授俾植立其爲文辭浩漑  
勢盛衝激巖嶽風止瀾靜卒不露飄泊其善養氣者與所  
爲文號宜山集若干卷讀易管見四卷詩一卷藏于家元  
配何氏子二人曰龍吉鳳翔女三人長適常踰次林定老

徐天祐再娶陸氏子二人鼎臣衡孫女一人適林街三娶  
陳氏女二人尙幼曰昇曰鑑皆庶生孫男女各四人君卒  
於延祐 年七月某日卒年五十有八梅在翰苑時嘗以  
君薦于承旨程公程公曰吾固知之得無以南士累乎相  
笑而止至治元年二月承徵至京師預考禮部進士策名  
得林定老後登上第授奉化州同知定老踵門拜且言曰  
潘君實婦翁先生嘗知之矣將以今年八月庚申葬朱溪  
祖墓敢以銘請又言婦翁嘗從先人先人卒定老生未周  
矻矻撫字終以女妻之由是悲且歎曰師友道喪久矣是  
尤宜書銘曰

長紳峩冠日出脂韋莫室其逢委蛇以嬉白駒在谷不屑



不辱決臆過都孰繫其足生人匪艱成之實難丸泥障流  
彼駛者繁氣直以堅維德之完謂隘不由其名奚傳

江陵儒學教授岑君墓誌銘

慈溪黃宗卿震之季子叔英彥實甫壻餘姚岑氏咸言岑  
氏善擇壻彥實館其家以詩書授子弟彬彬于于鈞漢纂  
元融液品節各就條貫掉鞅於詞場者九宜焉延祐五年  
岑君良卿以詩義上禮部第二柄時爲殿試讀卷官定甲  
乙七年其弟士貴貢于鄉柄以至治元年再入集賢預校  
文選詞賦工者擢前列暨拆名則士貴也國朝治定踰百  
年始立科舉江南行省有三而襄郢東西淮之士亦隸南  
選三歲止七十五人登名上于庭者三黜其二岑氏連取

之盛矣哉論德考實必推其前人士貴懷牒南歸以其先  
府君之狀來請銘君諱翔龍字雲起踰弱冠卽起家爲高  
節書院長調和州教授又調江陵教授幼警敏能文辭性  
慕高潔以禮自持植廢舉缺罔有怠事鄉里稱孝謹事大  
府能使貴盛者咸愛重之大德九年卒年四十有五吏部  
教官格年踰五十始得入州教授州不滿三十而接踵嘗  
數百人十五年始得授且守缺近三四年遠至七八年故  
多不能食祿而陞于路者非耆年則下世矣君以盛年徧  
歷宜蒞于民不得年以沒前佚後室若有憾者未一紀兄  
子登進士又三年子亦進士較其得失是則亦奚有憾焉  
也矣娶王氏先九年卒子男五文仲朝瑞爲伯父後士貴



今授某官季德盛楚材女一適鄞范某至大元年葬於上林鄉召輿之原古者銘藏于幽後揭於墓道懼人之弗先見也禮生於人情弗忍焉耳矣乃表以銘曰

蒼姬展親岑亭啟封棘陽專居傳漢益隆矯矯舞陽佐運闡功後興儒碩錮禁以終定籍會稽支居鹽官三相佐唐偉績彌刊或鳴以詩載車和鑾降宋中微其譜實完蹇兮在山不駛不償卒達于川百折混混孰導其先孰開其蘊肇者不居來者益振執券獲酬雙璧是陳載考令德其馨網緼我銘以昭益勵後人

河間清鹽使郝君墓誌銘

君諱從字從之霸州信安縣人壯歲秀整植聲節與人交

不爲儉薄意拯其急難里人推德之至元十三年爲河間清鹽使副後陞正使治弗煩擾而政日以理始君從弟彬弱冠事裕宗後爲工部尙書官寢顯從之曰吾郝氏由大父宛平君多惠政後宜有顯者徵在尙書吾仕宜已矣會得末疾息心斷家事調佐寒暑力補治策杖閭里如平時踰二十年嘗謂其子志善曰才能不如古人擇今世賢公卿如古人者事之斯近之翕赫取貴艷非進身本也志善從太傅丞相之子大夫游始爲北郊署丞爲監察御史而君與世嗒然益若相遺者焉延祐五年十月某日卒年七十有一噫士患不知命逐日希影挈挈然不返若君能知止矣而其弟參大政罷歸閉門幾十年亦不出今拜大司



農郝氏之昌殆未易量也考諱德仁妣李氏宛平縣君諱政以參政贈資德大夫尚書右丞追封薊國公諡康靖賈氏薊國夫人配劉氏二女長適楊居義次適集賢照磨李忠將以十有二月某日葬宛平君墓左御史來乞銘銘曰始奇終闕覲德日溫訓言衡門不華以尊曄曄大椿灌膏培根弗利其身利其後昆

翰林學士承旨贈大司徒魯國王文肅公墓誌銘  
翰林承旨贈大司徒魯國王文肅公至大三年六十有六薨京師假葬于城東隅至治元年其孤翰林待制士熙始克奉柩以某月某日葬東平祖塋瓠山之原士熙拜且泣曰墓上碑則父友翰林學士陳公儼屬比銘之矣今葬日

薄知吾先公莫若子幸誌其厯官行事納諸幽堂楨不敢辭爲之辭曰公諱構字何堂年弱冠以詞賦入鄉校賈文正公一見器偉之禮載以歸俾教授其子遂來京師至元十一年授翰林國史院編脩官由院中敘遷應奉脩撰陞侍講進翰林學士訖承旨佐丞相府爲司直厯吏部禮部二郎中太常爲少卿於臺外江北淮東道提刑按察使副內治書侍御史入省參議中書省事復出守濟南公之在翰林也辭命詔令多所撰述其最傳于朝者曰世祖皇帝諡冊追諡太祖冊武宗皇后冊於實錄預脩世祖成宗兩皇帝定武宗上尊號親享太廟儀在太常考輯因革有敘其佐丞相府剗刮蠹弊更始選士丞相齊魯公信從之爲



治書時值桑葛擅中書政柄嫉方直士檄公偕翰林承旨魯國文貞卜忽木公覈究燕南錢穀約一月治辦公先事計畫不以累魯公會桑葛誅乃得免其按淮西不切切近名而吏亦不敢慢事治吏禮二部無缺緩同列見公署事不復視成牘以行參議府六年一時執政聽南士陳利便搜括田賦時平章政事何公榮祖與公正色不少讓摧萌折貪卒俾其謀以寢始天兵平宋詔徵賢能李學士槃同受旨公至杭首言宋三館圖籍太常天章禮器輿仗儀注當悉輦歸于朝董趙公文炳從其言今宋實錄正史藏史院由公以完守濟南寬貧民官逋脩閔子祠復學田觴詠自娛而訟益以簡承旨李公謙幼師之遷應奉卒推以先

始受命勤敏通博一時鉅公皆屈己期獎後卒與相並史館辟署叵慮數十人今相躡清要皆門下士其爲文閉閤詠諷落筆纒屬不止於王言爲尤長臺閣故事資公始能奉行事兄戶部侍郎桓如嚴父惇姻睦宗在中書迄不尙私其親人益伏之同里陳公儼爲孔顏孟教授年幾五十矣入徵拜監察御史未幾爲翰林直學士蓋公昔嘗薦之王愷年七十爲編脩官公請于朝以待制致其事資歷循敘銓衡所宜守文字官陞擢詔旨具在後爲繼者緘口不薦一士視公誠可愧也公之系由瑯琊居東平自八世祖爲宋司農卿守鄆因家焉魯祖瑀登金進士第官奉訓大夫滄州無棣令妣范氏祖鐸以公官承旨贈正奉大夫太



常大卿妣杜氏臨沂郡夫人父公淵贈昭文館大學士資  
德大夫妣薛氏瑯琊郡夫人昭文當金亾時有兄三人攜  
妻孥南徙昭文私自念王氏大墓盡族以行孰與守下車  
伏草莽兄呼其名第不復得後騎迫大慟以去昭文傭保  
自活迄全其墓厚德勃興於公見之矣娶薛氏魯國夫人  
是生士熙再娶許氏皆先卒晚歲得二子士黠士然女一  
嫁薛晉士熙能文辭有聲將大用於世推薦賢之功王氏  
殆未艾也銘曰  
德充智周世莫與儔士林之標獎士無方譽旄珪璋孰阨  
其遭文鳴盛世金石雜比厥聲四昭子也允文戰兢紹聞  
嗚呼乎公之名益以高

磁州知州程君墓誌銘

程君諱翔字鵬舉以孝友聞于州里後其子若弟官江南  
恂恂愉愉夔然異衣冠常流於是江南之士族咸取以爲  
則嗟夫世降俗媮能竭力以養者有矣友于之乖君師之  
嚴不能以戶化若程君者發於良心成於身教是宜揭豐  
碑以昭示薄俗按其狀曰世家廣平大墓在城西南兵難  
譜軼獨記其父名約是生三子長卽鵬舉仲曰翱仕至僉  
浙東廉訪司事叔曰翼吉州治中二季以宦業表著皆君  
之教君綜家治生服其勤勞俾弟悉意問學聚書延師靡  
密叢雜一不使亂意弟則曰匪我之能維吾兄之成其事  
父承接意指日侍食候可否或卻食卽不敢食懷甘割鮮



斥幼者避席以立佐治湯液時其寒燠卒能以上壽終既  
除喪謹上冢禮脩誠厲行分寸不使越繩墨鄉閭尊之昭  
文學士張公孔孫集賢學士劉公慈曰吾徒不能以卓行  
薦諸朝是誠有愧年七十有一卒於元貞二年正月七日  
葬某鄉娶張氏子四良弼良輔良佑良佐君疾革呼諸子  
曰父死異財違古禮慎遵我訓若君者懿德斯備而復以  
囑其子程氏之澤良未艾也良佑始仕在中書右司歷參  
議府戶部宣徽院改授太常太祝出爲鎮江常州推官浙  
東道宣慰司都元帥府都事甫解職以選守令授奉政大  
夫上都路興州知州孫十人孫女九人良佑來請銘君弟  
之子良能松江府橫浦場司丞良士溫州路永嘉場監運

亦曰伯父事實將湮佚宜速銘以詔後君以推恩贈奉政  
大夫磁州知州驍騎尉追封廣平縣子張氏追封廣平縣  
君銘曰

惟民初生其仁肫肫摩盪恣情有戾彝倫展也磁州執德  
養淳奉盈臨淵踧踖以遵陳饌在堂手函脆新候顏以趨  
厥容孔溫爰用則之施于家人濟濟雁行厥聲四聞永裕  
是嗣振于朝紳城南之塋有大維椿爰勵薄俗表茲堅珉  
榮祿大夫大司徒特進饒國吳公饒國夫人舒氏

墓誌銘

至大三年武宗皇帝廣孝錫類以翰林學士中順大夫致  
仕吳公克己特授榮祿大夫大司徒封饒國公妻舒氏饒



清容集卷二十九  
國夫人夫婦同日受封其子元德真人元教嗣師全節歸  
饒州安仁縣下馬入里門奉制書跪堂上二老人卻立望  
闕拜命誠負軼前古延祐元年壽八十仁宗皇帝遵先帝  
故事錫上尊文錦以尊顯之表署宅里榮耀極致人子之  
崇侈其親者茲亦備矣元教嗣師實開府大宗師張公留  
孫之大弟子延祐六年公與夫人壽八十有五五月丙辰  
公薨全節號泣不食得請于上倍道星馳以歸十有一月  
某日饒國夫人相繼卽世嗚呼生榮死戚訖同以歸盛矣  
哉人子之事其親情至矣而養弗能以盡養足以盡而祿  
弗及者千萬焉貴極於王侯褒追之禮見於墓下則凡通  
顯之事親者十無二三焉合唐宋譜胄幾七百年具慶僅

一二見吳氏之德胚胎磅礴是誠有攸來矣喪禮莫嚴於  
儒者飾情表行哀不足而溢於禮者多矣元德力行而兼  
有之茲難能也至治二年春全節泣且告曰將以九月某  
日合葬于崇德鄉山田原願述我先公先夫人之世系而  
銘之隧道有碑翰林學士元公則爲之矣古者墓而不墳  
藏銘于幽懼世之久而弗知也視其姓名有不忍人之心  
焉後之慮其親者則曰立於墓人之見之者不忍矣何藏  
焉碑於隧斯敬矣銘於墓斯仁矣謹按番禺吳氏皆祖番  
君芮饒公會祖岳祖夢旂父鑑追封某官諡文靖妣陳氏  
追封饒國夫人公字祥甫卑讓自持不善者避之善者從  
之身貴矣禮鄉黨以和視後進煦然以獎誘觴至益持重



戒其子侍帝左右毋以我耄為往返夫人舒氏諱妙真世  
儒族祖某父某公蚤事舅姑盡孝敬晚歲主祭享親滌濯  
遇諱日淚涕滿頤睫內閭姻黨咸儀則之高堂齊眉人以  
為福德具備何憾焉子四詢承事郎誠蚤卒叔即元德君  
季全義女二嫁某官孫男五人善集賢脩譔能文詞孫女  
若干曾孫男女九人銘曰

抑抑吳伯植節秉仁毀形以逃克昌允孫傳國中圯是生  
番君得其民心徙王策勳代有顯賢支庶日繁廟食演裔  
饒惟邇親執經武夷源同派分是生饒公守謙以文大盈  
彌虛黜驕鏡昏厥配氏舒廬江之蕃相唐始興矢辭派騫  
楚吳犬牙譜謀是遵德儀婉賢象服紛紛訓子以忠不私

其門顯晦偕老死生同根道以易傳德以簡尊悼哉合宗  
允顯皇元

咸淳元王間吾里陳公肖孫以善政事驟用由大理寺丞  
知嘉興輔郡未幾兼浙西提點刑獄踰年兼度支郎官人  
謂且大用矣會旁郡山寇起罷歸不數月疾卒喪除其子  
嵩伯候平章賈某于馬前平章入政事堂謂宰屬曰陳肖  
孫一廉可取宜與致仕恩官其子當上奏餘人勿得為例  
既授將仕郎宋社亾不復可仕矣鄉人尊之為海陰先生  
先生少歲力古學不屑事科舉聚羣經師說商略讐證下  
逮旁聞曲記遺言懿行譜謀星厯之說皆手抄與梓本書



相竝篤於信行傾急解難道里寒暑不廢其學溪湛詳博  
尊聞傳信懼悟解者汨其真嘗禁止之非其友不友既友  
矣必反覆護衛不使有議之者友或叛去先生泊然不爲  
言人益服之桷先處州府君於朋友義尤敦敘而先生行  
事亦相近故交好尤善厚先府君卽世時來城中愛撫彌  
厚嘗曰汝父宜有後昔百受欺今詎使一無報邪大德五  
年桷備翰苑屬後屢遷先生喜溢眉睫曰吾所期誠不妄  
延祐六年二月得微疾作書與常往來戒勿用浮屠事且  
命桷誌其墓幸以故人子何敢辭先生字貴白甫世居奉  
化之鳩鵲山卒時年七十有七葬某鄉某原妣方氏封安  
人曾祖聰謀妣孫氏祖師稷以度支明堂恩贈朝散郎妣

陸氏鄔氏追封安人娶樓氏子二人紹廉紹庭孫二人先  
生仕不逢時學不展用熙熙然以壽終於後人有徵可無  
銘以俟銘曰  
駕車康衢佐夔龍日昃之離命不逢寤言弗告隱志充畚  
田瘁耕黍稷豐考覈琬劔手澤功大椿養齡蔭寵從靈璞  
久闕合鴻濛是式是似後當隆

處士黃仲正甫墓誌銘

嗚呼自聘舉之法疏人得以易售抱德藝者羞之後法始  
密益不冝自進有薦之人不盡識或曰彼士奚足取又或  
曰士若是者眾使一取之將曳踵以至桷官翰林最久故  
有若吾黃仲正甫之賢明經博聞卒不能啟口以告于當



路嗚呼今亾矣果使無傳則誠有罪矣仲正事母孝居家無語笑聲待弟姪不使有忤意持敬讓以禮宗姻鄉黨長者洽之幼者慕之其學汪洋整經以載道必考其精微幽顯之委折於史辨疆理氏族制度官名之興廢旁搜博徵曲而通確而明故爲文辭纏屬不能以窮將臻乎極而始底于用欲以名世者不在仕進也有司三奉科舉令卒不應試而嘗以其說授于其徒昔者聖賢憂道不行於時由列國言之誠遇焉斯得矣今天下一轍達而上者其說具在布衣焉以遺逸舉進以秩祿而縮在下不能有爲仲正之不屑者在是儒病通乎古而不知今昔之在上位顯重名其行事執復誤後世甚者竊高爵講說他方以鈎微

台仲正嘗勃然不喜然竟不假以年則誠可哀也已仲正諱叔雅父震宗正少卿提舉浙東常平茶鹽咸淳間號名二千石晚歲高遜以卒仲正不仕繼志焉耳矣世居慶元慈溪縣鳴鶴鄉曾祖世珪祖一鶚贈朝奉郎妣趙氏配鄭氏司農寺主簿大澤之女子二人正倫正倩今葬韋家與之原延祐七年五月二十二日卒年五十有四銘曰  
闕觀稱貞舉世顯榮肥遯靡求孰爲之升君允矣恬寧奇漱英求知者天卒韜智名有年不脩莫究其成我銘孔哀以永厥聲

將作監主簿蔣公墓誌銘

朝奉大夫將作監主簿蔣公諱曉字堯臣淳祐七年進士



以至元二十四年卒年七十有一葬奉化州長壽鄉邵輿之麓曾祖榎朝奉郎通判台州贈中奉大夫祖如愚朝請郎通判隆興府贈太中大夫曾祖妣張氏楊氏伍氏贈令人祖妣諸葛氏封安人贈淑人考嶠文林郎池州貴溪縣丞贈朝奉大夫妣湯氏贈宜人既葬三十有六年長子景先卒無子次子昭先次其先德家譜來請曰蔣實望族七世昭穆皆鉅公著銘罔缺軼我先人在時子以子孫禮見且承學今子在太史非子銘其誰宜稱不敢讓銘曰

蔣姓宗姬函亭漢侯居鄞發祥唐季是稠厥孫評事清淨急施有嗣金紫益振以義忠肅陳公謫明絕朋俾子允師連桂以登曰高祖考宰邑孤高相京傳私卒忤以逃是生

台州繼以隆興倅貳有聲再世是繩誥誥貴池丞邑退卑厥兄諫議職穹聞馳愍弟有孤將授門功公謝弗受迄升南宮試簿仙居復攝寧海卻妖節浮民靡匱貸入理京獄直囚不刑揆其隱姦大尹以驚出邑武進適易分水嚴盜獫張召公顛治摩磔羸頑請粟食賑楮帛賦繁直疏罷進神存正祀學飾新象彼厖者叟祠祝泣想爰倅于越撫民彌加計臣增輸牘諫戢譁佐餉既終監舶涖溫香珠翠毳罔游于門輯爲成書以儆墨愆彼相嫉廉改司匭函白璧襲緹卒罹其讒晚佐繕營國步日窘罄竇食貧絕見喜慍少窺刑書復入詞學記言博精灑墨清犖譜書庚申文紀甲子視階郎中澤奏冢嗣歲行丁亥九月庚戌飾巾辭終



清容居士集卷二十九  
壽七十一厥嬪氏曹箋詩之曾子曰景先無祿絕承有季  
昭先守儒俟徵墓在州南先域接挹集藏于家厥帙爲十  
維公儀觀偉古動人前聞後訛指掌剖陳巍坐若尸不傾  
不陂彼諂有徒正色以止耆舊川淪來者荒塞昭銘墓門  
以作後則

清容居士集卷第二十九

清容居士集卷第三十

元 袁 桷 撰

墓誌銘 墓表 葬記 附

宣武將軍壽春副萬戶吳侯墓誌銘

往者壽春爲宿亳要衝犬牙相承城郭樓櫓移易無常所  
草舍殘缺狐兔出沒道途間築覆土窖以避妻子短兵迎  
接利不利不復計猶持農器治田壤惴惴求活歲率如是  
世祖皇帝以天兵取江南捨兩淮爲最後至元十一年冬  
渡江十二年平江東抵錢塘宋社告亾十三年兩淮爭奉  
地圖以降無鏃刃之費天下大定而淮始得爲樂土矣當  
是時吳侯祐以壽春歸職方其子安民字惠卿侍父居顏



行率部伍招輯潰卒控曹橋下獨松渡越江略定會稽台  
溫三城南踰閩嶺拔莆田擒將李雄生俘其守臣而以功  
歸其父二大帥曰吳氏子宜第其戰多別有以賞勵乃署  
千夫長十四年父卒始襲爵佩金符爲管軍總管鎮揚州  
十八年大治兵伐日本拜疏請行授宣武將軍征東副萬  
戶領淮東西兵以先舟師抵其國八月颶風大作器械軍  
士沈溺物故柳破舟亂流以經海島高麗日本二國常不  
相能遇高麗邏人問所以載與還而先帝亦厭兵罷征矣  
二十年建黃華反奉命往討之至政和縣獲賊將度九峯  
嶺接戰益急得其僞署圖籍虜驍將以歸十有二月昧爽  
進軍平溪華盡死力拒砦赤巖山盡俘其器甲族屬黃華

始平迴鎮揚州二十一年省治杭州從與俱其年鎮湖州  
路南潯明年調嘉興路海鹽未幾復還南潯又還鎮壽春  
二十四年詔領軍討交趾至黃州罷兵二十六年鍾世明  
叛江西吳太仲叛興國縣搏奇蹂虛率以底寧上功司勳  
輒卑退不欲言三十年移鎮和州大德四年七月某日卽  
世年五十有七娶楊氏先卒子男若干人長繼武襲其爵  
葬于宣武侯之墓左曾祖某祖某妣某氏予嘗聞古名將  
垂老吶吶若不能言祕畫勇略壯歲所施無畱蘊閱成敗  
得失已盡醇酒鍾鼓夫豈託焉以自完者與烏江馬君某  
言吳侯知儒書後悟浮屠氏禪學充然若有得其女弟亦  
能爲禪人偈語是皆世所鮮有者銘曰



維昔淮甸勁雄莫侔一夫當百鋌戈怒投裏彼乾餽聿嚴  
盛秋養安懷怕苞桑靡謀天錫大帝神武興邦捨其喉襟  
投鞭浮江俘鴛擒驍百城春撞視彼彈丸後夫卒降桓桓  
吳侯效命奉職以其素能昭代著績褰裳先登颺掠電激  
或乘其巖或躡其跡瞻彼霍山雲流無蹤昔困于兵今黍  
芄芄繫帝之功維民之逢侯之幽宮松柏茂直告而孫子  
靡懈靡忒法其退謙恬靜以默我思于淮作銘示刻

同知樂平州事許世茂墓誌銘

端平三年蜀破衣冠大姓順流下東南至江陵十不存一  
二皆舟觸巖岬瞬息以死淳祐三年蜀益蹙避兵來南其  
物故與端平無異宋主憫其流離悉擢列在位大者輔政

機備獻納外爲閫臣郡將經術史學四方取以爲宗則宋  
旣亾故國世臣益困辱不自振淪胥泥塗非獨蜀士然也  
大德七年擢備史屬選與虞忠肅公孫集交許君松以湖  
廣掾上計京師詢其官簿則顯謨閣學士給事中少保諱  
奕之曾孫中奉大夫知紹熙府諡介節諱彪祖之孫奉議  
郎通判涪州諱長源之子君字世茂懿範世則珠貫而櫛  
比語四蜀事歷歷在指掌清言雅儀筆札擅簡古卑讓恥  
與後進較酒至醉愈恭不復作世俗語遂縮與之交至大  
元年授潭州權茶副使再見之貌益溫論事盡繩墨智圓  
氣完欲以政理自表見故其爲茶官也不務苛刻而課有  
贏羨仁宗皇帝立科舉以君考鄉試自喜曰吾嘗貢于鄉



黜浮培實宜以稱明詔是歲君所貢士入南省號爲得人  
延祐五年授徽州路婺源州判官復與語輒愀然曰吾家  
由開慶初辭簡池寓南康墳墓井邑生別踰五十年貧不  
能忘祿齷齪州縣弗得以文墨顯吾何爲哉其治婺源益  
自振剔絕蔓揆疑明以近民而盜跡不敢入境至治二年  
見其神益清貌益癯舉酒屢酌卻雋永猶喜議當世事桷  
與翰林直學士曹君元用子貞共署薦爲湖廣提舉儒學  
思以佚其老集賢直學士鄧君文原善之亦曰是舉誠不  
忝吾爲江東分部使者嘗舉其政事文學矣十一月授承  
直郎饒州路同知樂平州事歲終得上氣疾正月甲午終  
于邸舍年七十有二曾祖妣某氏祖妣某氏妣某氏娶趙

氏再娶陳氏子男若干人女若干人孫男若干人始君居  
南康閉門授徒以奉母右丞燕公公楠開營田司知其賢  
取以爲佐後遷行大司農益任之掾湖廣省六七年能以  
儒術輔法令事明理融無底滯固陋一時吏師尊禮之君  
始生踰百日晝夜啼不止有僧祝其頂曰汝爲許氏子啼  
何爲耶啼乃止未幾涪州下世年八歲隨舅氏茶馬趙君  
寓江陵里有災能取涪州神主奉以逃稍長益自奮勵諸  
老咸器偉故晚歲宦業雖不大顯而行事有足稱者其喪  
歸以某月某日葬于某原子咻踵門以廣信劉君光事狀  
泣曰願請銘梅泣相向不復辭嘉定更元韓侂胄誅解僞  
學禁先少師正獻公會大父樞密越公相繼入著作庭給



事中少保許公巍科首班著善類肅穆天下傾動未幾少保論外戚不合去今幾百二十年閱昔時題名求其嗣續率皆斯盡銷鑠而桷與世茂俱爲曾孫相顧自保灰編墜簡證世德之舊於世茂實有望今死矣雖欲勿哀其可乎  
銘曰

蜀由秦開踰千載底寧英光蜚聲山川耀靈漢魏啟伐不假以兵唐宋踵規開門晝迎錦楹繡牆夸浮日矜帝鑿地圖百神震驚氈車轟轟金戈晶熒自西徂東舳艫貫繩或沈于淵或疫以乘蹇蹇許公疑丞弗登是生介節嬰彼孤城恂恂涪州弱息慎承流離拮据守其書籬儒以飭身政以裕名匪急於祿抗宗希成凡我士族欒范是懲東南之

區凜其春冰我思許君是用述銘

任隱君墓誌銘

鄞甬東橫溪多郡宗故家桷之七世祖祥符丞而下娶婦皆楊氏少保夫人曰申國太保曰越國魯國太師曰齊國幾三百年矣楊袁爲中外表歲時往還無虛日而甬東任氏與楊姻婭亦十餘傳一日任氏子元善介子表兄楊仁之以其先君子之狀求銘復錄其十九世祖唐建州司馬遠之葬記以示其記曰建州生佶檢校尚書工部員外郎兼侍御史是生崇試循州司馬循州生貞幹元和十三年補集賢殿供奉承旨後爲越州都督府功曹參軍以終集賢生行規大中時以明經薦于鄉舉上第爲蘇州司兵參



軍吾里士族莫先於樓袁楊蔣作郡志者於任有缺仕莫榮於集賢承旨承旨布衣爲者也職譔述校理在元和時任不輕畀司兵以明經登唐上第九偉著志亦不紀考孫吳有任光任奕皆鄆句章人今其地爲鄆縣則建州蓋二賢之裔而先賢皆遺軼比予補郡乘亦缺然有愧矣嘗考大中以後鄆數爲盜侵掠城燬蕩遷徙錢氏以宗親專節鎮租稅刮剝民不堪奉昔時故族躡藉銷鑠於任氏桀可見至宋受版圖興文儒鄆士在汴始盛渡江以南雲滄川湧幾二百年而不幸數十年詩書廢墜望塵執隸欲爲任氏十九世之傳不可得噫可勝歎哉可勝道哉任君名天祺字君瑞曾祖汝諒祖用康父逢龍其居鄉善保衛徵調

數起先事以備縣胥不能高下友其弟天麟弟病酒死曰吾不可使弟無後殯其喪俟我死必俱葬也大德七年六月某日卒年五十有八未幾弟婦顧氏亦卒以其遺言大德十一年十二月丁酉奉柩與弟及婦俱葬于吳公山之祖塋妻屠氏四子元善可善承弟後達善兼善孫男四立道宏道鳴道原道孫女三立道楊氏壻也銘曰

世胄日顯任譜完堂堂文藝志錄傳昔通今晦理則然鄉井急誼手可捐金義東聳下泓泉蹇極遇順盈百川我銘考官以昭先歷十九世緒益延焯哉任恤德靡愆率而雲仍亘千年

史景賢墓誌銘



清容集卷三十一  
君諱韋卿字景賢鄞史氏故國世臣太師丞相保寧軍節  
度使越忠定王諱浩爲曾祖妣貝氏魏越國夫人大師中  
書令保寧昭信軍節度使衛忠獻王諱彌遠爲祖妣潘氏  
齊魯國夫人觀文殿學士正奉大夫奉化郡公諱宇之爲  
考妣趙氏高平郡主君幼成合矩度進退持奉侍立占對  
識者知真王孫筆墨書史楚楚自將皆有法郡公目送淡  
念之稍長鉛采自陶寫蒼松斷崖昂然有遺世意宮商敷  
宣綵鸞詠而鳳幽鳴也退靜韜匿冥會于千載之上察其  
念良是矣郡公職二品君當以京官入仕生晚祿弗及至  
治三年秋八月得上氣疾卻藥賦詩出別語於宗親桷時  
官京師呼桷子確立牀下曰爲吾語而翁求銘以昭吾志

焉越翌日辛酉果卒嗚呼年甫四十有八章綬積襲隱顯  
有定數至於年亦不得永是可哀也已維忠定王桷外高  
祖幼習外家獻文世德相業焯在宋史不敢論獨敘三世  
壽考以增君之悲維忠定以三公居東湖三十年陪祠慶  
壽秀骨山立多士秉笏交語曰史太師真壽相年八十有  
九卽世忠獻獨相二宗二十有七年總核庶政燭照數納  
罔有缺年七十以終郡公恂退若癯儒厖眉素毫冰玉照  
焜鄉黨年七十有九乃終壽種彰灼若是君才不得一見  
施設年又不能以紹傳是大可哀也已子一性孫女二將  
以某年某月葬鄞縣陽堂鄉金奧之原銘曰

寥寥東陵瓜圃熟沈冥里閭企高躅達人知命化不忍手



持參差入雲谷周公魯公儼初服奉著以占剝斯復學詩  
習禮在嗣續我銘孔悲辭匪瀆佳城鬱蒼覘宰木

袁州知事孔君墓誌銘

大德初元孔君昭孫明遠甫爲慶元儒學正于時禮部尙  
書王先生應麟師表後進門無雜賓明遠以通家子執疑  
證訛桷每連席請益時則有教授某恣睢自負語侵先生  
乃憤然曰吾不能與之共處疏其謬誕十數事鳴于憲府  
人益奇其伉直有先中丞遺風是後爲蘄陽教授蘄陽舊  
爲邊障地君能化其俗使稍就學久之丕變爲儒士皇慶  
元年授慈溪縣主簿郡人咸曰是斥故教授者飭躬以廉  
民莫敢病未幾江浙省取爲掾會歲侵計富人籍田出粟

以賑吏不能舞文粟悉入市其直輒減宰輔奇之延祐  
年授從仕郎袁州知事秩滿泰定元年以疾卒時年六十  
有二君實孔子五十二世孫中丞爲大宗傳四十有七世  
中奉公傳與其從子玠南徙三衢賜廟譜牒章灼而君之  
考諱某咸淳間爲名太守後僉書樞密院事職進資政殿  
大學士而大父某亦贈太子少師謚文介曾大父諱某贈  
某官妣某氏某氏某氏俱贈郡夫人噫士常患爲世家紹  
宗趾媿懼難以繼仕顯矣德不稱無取也言足以斥姦發  
揚剛毅是則於孔君見之仕雖不大振於孔君何憾焉予  
嘗與君由義烏同邸宿至婺學旬日危坐論古今各欲以  
名節相勉而懷奇抱介予輒讓不敢今歸老田里期爲全



人思一見明遠不可得至是淇來請銘安得勿哭也已娶  
王氏前進士集之女男六淇淮繼兄後海蚤世涓繼弟後  
建德儒學正瀛慶元昌國州儒學正澣早天女二適山陰  
王塘富春張順可某年某月葬葉水浮河原銘曰  
金剛而冰清行之成也白兮不緇德之貞也憤世嫉阿全  
粹精也謝彼戚施實蜻蛉也銘以揭之歸藏永寧也

僉事范君墓誌銘

大德六年范君子誠爲平江路經歷于時梅將之京師道  
吳其郡大夫疑忌事多不決范君抱牘堂上定可否大夫  
領領不復有異議人皆曰是真贊畫才嗣後爲掾中書仁  
宗皇帝在東宮興崇禮文廣廟祭几視執政者率增贊畫

梅時日具紙墨君排剔研討使各中繩式莫有訾議嗣爾  
厭繁劇告外補湖州推官又爲黃巖州州與鄞相犬牙治  
跡賢否嘗耳接巷議州民來鄞必曰吾州黃氏子號豪民  
范侯能挫抑之帖首受罪後予直集賢黃巖之儒生暨商  
于城垆者咸告曰黃生易黃冠訴范侯以不直遂議于大  
學士郭公訖不受其說精神籠絡貫穿于儒術法律將大  
展其用而其子景文踵門泣以告曰先君之不祿在泰定  
二年閏月某日得年七十道遠不克歸葬以是歲二月某  
日與大父奉議君俱葬于平江路長洲縣武丘鄉白蓮橋  
之北原知先君莫如子敢以銘請謹按君諱忠其先京兆  
藍田人後籍真定今三世矣其爲仕首受史丞相之孫耀



辟爲浙東宣慰府掾改受蘭溪主簿再辟江浙行省掾乃授平江路經歷又授揚州路經歷不赴改辟都省掾授湖州路推官以選能爲海道府千戶分治四明知台州黃巖州英宗皇帝詔風憲舉守令再知徽州婺源改同知福建轉運鹽司事泰定元年擢僉江南浙西道肅政廉訪司事其簿蘭溪嘗攝尉事捕造僞楮當受賞君謝不取在湖州有訟弟死非命且疑弟婦受賂焚其尸君錄囚考弟實以鬪死婦始得脫湖多淫祠毀三百六十以治官舍分漕四明首拓廳事嚴竦治具新天妃宮以肅祠使其治黃巖黃氏事最著正彝倫絕攘奪尸祝口誦宜著于郡乘婺源俗尙競渡易其舟爲浮梁民不病涉在閩中鹽足於民而私

質者悉絕考其所居官興建鋤擊爲己任絕功利守名實爲君素志迄不展大用壽與祿不失其願亦可無憾矣嘗鑄禮殿祭器書二千卷歸于鄉學集賢王公仲常爲文以美篤于慈孝頌宗錄孤故贈禮部郎中白公某壯歲淡奇之妻以女君感知己凡所爲樂府稗刻以傳曾祖昂霄金大安元年進士官正議大夫同知靜難軍節度使兼邠州觀察使祖元泰元授從仕郎同知解州事父天祐汀州路經歷贈奉議大夫真定路趙州知州驍騎尉元氏縣子景文由臨安主簿辟江浙行省掾敏修善吏事其進將未艾孫二公琇公剡孫女五乃爲銘曰

吏詬于儒以儒爲拘儒以病吏其刻莫渝據會統宗孰承



其傳溫溫范侯趾嫩紹先化其奇觚不急以干削豪翦強  
欲援以手謂不大逢亦既祿壽世方尙名我獨倚之彼喜  
以功縮武避之武丘之原松柏峙植魂無不之子孫承式

鄭照磨墓誌銘

鄭威敏公驤以靖康虜難死同州紹興錄孤裒忠賜廟愍  
節至于其孫建德登進士第延賞守祠世嗣不絕五世孫  
諱元貞實奉祠事生孫曰端是生汝賢爲江西安撫司準  
遣生檜爲都酒庫官君之父也君諱文瑞字子祥生而骨  
相殊特府君深奇之稍長從鄉先生課程文有能聲科舉  
旣廢居里閭以孝謹稱至元間下令舉儒吏實預首選試  
郡功曹移典玉山郡侯復取自近省授監平江路倉轉海

道萬戶案牘官再爲海鹽州案牘轉行省鈔庫副使平江  
庾氏歲入浩夥不得脫君獨以治辦稱海鹽多豪民殺人  
率遣奴償死君能直之行省積敝楮三年不毀君上言申  
其數而歲除之後取以爲法泰定元年勅授將仕郎浙東  
道宣慰司照磨兼承發架閣子見君於京師言議縝密剽  
割苛冗中繁節暨官帥司下帷沈思吏跡不入戶勾稽研  
覈充然益有餘地古之善居官者必自持家始自衣冠上  
墟不復給足荷戈負耒何可勝道念昔信實要衝君獨善  
理其身掇拾化治任能竭力相其天時權其羸奇卒昌於  
官以發其素蘊是殆於君見之抑又聞之流光演休首於  
死節宋社云亾忠義之錄一二僅見則威敏之澤雖十世



未艾君續其承猗與盛哉其卒在泰定三年九月某日年六十有三某月某日葬某縣某鄉子男四謙亨復亨鼎亨泰亨女三嫁黃中正孫良玘葉原道皆仕族孫男七孫女七娶姚氏曾祖妣蘧氏祖妣劉氏妣謝氏謙亨奉柩將歸里踵門泣以告曰先生故大門知官譜唯詳而吾里獲銘者數家矧先子世系若是敢以請銘曰

志專豐崇足昌其躬家傳於忠蹇事于公美玉襲之良馬繫之不泄不辱云紹以續作之怍怍承之競競而子而孫視我斯銘

文清薛處士墓誌銘

孔子敘逸民謂其求志達道超然於塵垢之外心若槁木

形若蟬蛻動莫有跡行莫可名其混世也物莫與俱冥神內觀返真潛虛若是者其近之矣故昔之善晦匿者草衣菲食不導引以壽養其天年恣縱泉石厯揆遠挹興至而若遺擇幽絜以養其雅操求於世吾不得而見之矣今得一人焉曰處士薛君勉薛君信州貴溪故儒家自其曾大父子徹以儒科縣南丹大父琢父士亨繼業進士君益以儒自勵居鄉黨教授名不蘄彰沖然有容守約自裕游湖湘極交廣返築室于宜陽納幽據勝爲堂曰寶善以示子孫泰定三年四月某日卒年六十有八族黨姻戚咸會哭曰先生儒以紹傳茲其爲文也宜矣固窮而無求貽書以遺後其得不謂之清乎遂私諡之曰文清子二元義元儀



元義與余爲方外交在崇真宮數評議吾徒所當爲事詞章清峭翰墨簡潔每視之嘗以爲不可及君旣死求銘於余實不敢辭在易蠱之上九不事王侯高尙其志而初爻則曰有子考無咎嗟夫離世絕俗念不存於家非子承意曷克臻濟是肥遯者猶相須以成也妣王氏配孔氏孫男二女一以某月某日葬銘曰

冥飛維鴻莫窮去還飄搖長裾游於海寰沈匿不羈謝彼世艱貞簡峻清玉雪者顏支離似困爰養其遯先賢高風承耳接論葆真藏名永裕嘉問振振有子益昌者名三光盪摩服其粹精有大之松清風泠泠非培曷成非繼孰承

海鹽州儒學教授袁府君墓表

維袁氏四明大族由處州太守諱毅試開封府第一登嘉祐四年進士第佐蘇文忠守杭文忠爲同年生後贈光祿大夫生倉部郎中諱灼得罪政和以歸生贈朝奉諱垌朝奉生通議大夫諱文通議生龍圖閣學士贈少師諱燮嘗以禮部侍郎專史事諡正獻天下稱爲絜齋先生梅七世祖諱毅試開封以中書守當官遷祥符縣丞生曾孫爲少傅同知樞密院事諱韶贈太師越國公受學正獻公於宗譜爲族子相踵登淳熙進士第同入祕書省爲史官先後爲侍從縉紳榮之正獻生子四人俱至名卿尙書東宮官而第三子最清顯嘉定七年進士第一再世國子祭酒仕至兵部尙書給事中實錄史院修撰諱甫贈少傅諡正肅



天下稱爲蒙齋先生正肅次子諱後通判潭州是生君諱  
哀字德平以安定長授海鹽州儒學教授未拜延祐七年  
六月二十日卒年六十有一嗚呼甲族鼎貴莫盛吾里蒙  
棟接耀郡守丞監官議婚對未肯齒擬華腴爭高姿度悅  
澤可愛念遇大變故困辱不自完業無依歸質質以死者  
多矣方至元十五六年間故家猶亾恙海鹽時年二十桷  
年十四五私相議曰宦族久當圯宜斬爲傳遠計未幾正  
獻宅火畱城南遂各盡晝夜濬源鈎思揆索幽隱以黜陳  
辭爲已任考聞蜀東浙永嘉湖南江西之儒先合其異同  
不在於貴耳雜書襲訛輯言行者尊之吾與子所當辨更  
二十年各宦游四方君以憂窘困躓酒酣語豪卒不少貶

折詩筆益溫雅簡潔察其學猶以昔所言自任桷由集賢  
罷歸往拜焉病且瘠不能起忽手書曰夜夢游南嶽署已  
判官遂釋之曰南正火也火爲離爲文明宜司以瑞太平  
今天子興文祿弗及其在乎子孫未旬日下世夫子作春  
秋譏世卿史非世官不能兩家子孫凡五爲史官獨君不  
及用誠可憾曾祖妣邊氏秦國夫人祖妣趙氏衛國夫人  
妣趙氏封孺人子四曰霆曰杲曰銳曰齋孫一人有文集  
若干卷葬在正肅塋十步邇乃表于墓曰桷備史屬號最  
久見秉筆者罔再傳獨東平王公其子文且賢纂修有能  
名嗚呼吾宗免矣夫君不得預爲可吁厥子若孫永紹圖  
至治二年歲次壬戌族姪具官桷表



真定安敬仲墓表

嗚呼金蹂宋踰南兩帝竝立廢道德性命之說以辯博長  
雄爲詞章發揚稱述率皆誕漫叢雜理偏而氣豪南北崇  
尙幾何所分別當是時伊洛之學傳南劔至乾道淳熙士  
知尊其說闡明之朱文公統宗據會纖鉅畢備正學始崇  
又未幾僞學造謗咸諱其說以售仕于時金將亾各流離  
自保烏覩所謂經說哉有明其說者獨江漢趙氏私相筆  
錄尊聞傳信稍自異流俗皇元平江南其書稱載以來保  
定劉先生因篤志獨行取文公書會粹而甄別之其文精  
而深其識專以正蓋隆平之興使夫道德同而風俗一承  
熄續絕不在於目接耳受而有嗣也劉旣死得其傳者曰

安君焉君諱熙字敬仲其學汪洋靜邃謂文以載道辭不  
勝不足以言理故其言修以立於詩章幽而不傷慕貞絜  
之實將以自任其道者也道散於異端九流證拾於墜簡  
傳者益遠而書幸具在不知而作者則索於句讀之末旨  
意斷絕踵謬而莫悟君設對問以辨後作者悔而焚其書  
左氏浮誕不合經者悉去之續皇極經世書由元豐至至  
大三年考家禮爲祠堂以奉四世邑人化之教人也持敬  
爲本解經必毫縷以析果知之必驗其所行弟子相從者  
常百餘人出入閭巷佩矩帶規知其爲君之弟子其於劉  
先生也未嘗一見之蓋篤信其書默求以通焉者也劉亦  
知君足以傳道卒不得見焉君淡悲之而於學有似君無



憾矣君之先太原離石人五世祖玠仕於金曾祖昇不仕  
祖滔以經童登第金將亾徙真定因居焉戊戌歲詞賦入  
等占儒籍考松江東宣慰司照磨妣劉氏君少敏悟諸父  
咸器之素多疾嘗避隱封龍山然卒不得年至大四年五  
月某日卒年四十有二娶張氏焦氏子二壘垣女一嫁保  
定等路鷹坊總管王冲是歲葬藁城縣安仁鄉先塋之側  
其卒也翰林學士王公思廉以書唁其父曰自敬仲死詎  
安氏不幸士林不幸矣有遺文若干卷既葬之十三年門  
人蘇天爵述其事狀踵門曰默齋先生天爵從學寔有年  
先生之德之行願表于墓原使有考楨作而言曰真文忠  
公德秀與朱文公同里生不及事焉文公之學真實紹之

侑食于廟于祠無異辭集賢劉公生愈後闡揚合一劉公  
功與真公竝安君不得見劉公而道寔有傳盛矣哉春陵  
之學四方爲有準矣某年某月某日具官袁楨表

史猷父葬記

代其子作

大德丙午九月朔我先君子壽春推官卒于寢年七十有  
三越十月丙午葬其地邇高祖越忠定王墓次百步許先  
夫人郭氏卒葬十五年乃合窆焉嗚呼先君子諱徽孫字  
猷父少孤祖母嚴氏躬教督具諷先訓感悟于時史氏極  
貴盛壽春癯然整修奮棄子弟玩習掞紹淵懿族祖文靖  
公見之曰兒當以文名吾門稍長試吏爲諸暨主簿從政  
精覈邑長缺使者俾治幾一歲入辟淮東治田事調揚州



司理參軍帥大器重悉以事付甫授壽春帥益取自佐循承直郎而先君子不復仕三十有三年矣有詩文若干卷晚讀陶靖節詩語近意遠視世德脗合淡自慕儼平居無愠忤色筆墨清藝觴至輒就放邵子觀物爲詩數十篇久更困約益以理自得清日危坐道舊事緩語不絕口鄉黨賴焉嗚呼公亘等五男子爲從伯父從叔父後者曰公玉公謦次公晝公亘女三已嫁仕族浙西提點刑獄贈少師諱彌正爲曾祖紹興監酒贈朝奉大夫諱實之爲祖朝請大夫通判處州諱顯卿爲父將葬謹書納諸壙

張府君墓田記

平章畱守亞安公介其掾韓叔亨致命於袁桷曰吾外大

父張府君世燕大姓貞祐來兵革相尋獨府君逃難脫死每言避兵本末輒吁歎涕泗且曰吾譜牒亾缺使果得仕吾安能爲祖父榮顯耶由是益治生自裕強之仕弗願也至元十五年三月某日卒年六十有七外大母劉氏次黃氏俱無子一女劉出也嫁我先公中奉大夫湖南宣慰使後以卹典贈金紫光祿大夫大司徒梁國公而吾母亦得封爲梁國太夫人府君之塋在大興路大興縣宜泉里歲時率外孫奠薦于塋下封植崇謹顧瞻咨嗟推其所自出其接于見聞者誠莫有怠也更數十年則曰禮有隆殺焉推服盡之義至於異姓則必曰先王制禮不可過也夫禮由情生使張氏有後焉誠不敢越吾懼其塋域之蕪沒詔



于曾元將有以謹諸爲我記之梅聞諸春秋會盟稱辭甥  
舅之國雖數十世猶徼福於先君敦敘之義蓋可考也掩  
骼埋胔先王之令典畱守公之用心合於禮者之爲也凱  
風寒泉藹然見於悽愴情之至也然則凡爲子孫者寧不  
守其家訓也哉府君諱祥字瑞之壻梁公諱某外孫長卽  
榮祿大夫平章政事大都畱守領少府監行工部事佩金  
虎符武衛親軍都指揮使兼大都屯田事次某承務郎太  
府監左藏庫使次某奉議大夫太僕寺丞外曾孫凡若干  
人延祐四年九月某日具官梅記

田氏先塋誌

太僕田茂實君秀與梅交京師相好也大德乙巳三月某

日其先君子諱某年六十有五卒于河南君秀墨色蓬首  
哀不絕道兼晝夜行歸治其喪將窆于大塋卜以不吉告  
越二年始得吉于邙山之白李莊乃徙武略君與夫人齊  
氏合葬以諱某君祔至大戊申君秀奉家譜言曰嗚呼先  
君子德豐而養薄孤之罪也田氏世居豐州有試金武舉  
科爲環州司候者諱青金徙汴拜武略將軍總戎千夫屯  
鄧州鄧歸有元改爲襄樊屯田官豐州墓夷徙始占籍于  
洛陽武略吾大父也先君子嘗言金將亾城郭蟻潰四出  
馬塵南驅躡藉爭死枯骼野燐千里一色豐州爲路衝荒  
墟敗礫白日無人行聲自吾少年聞祖父言每震掉不自  
已今汝生盛明時重和累休振纓清朝吾老於斯土蓺于



田漁于河涵煦濡濟食安闕華沒齒誠樂也仕何慕焉茂  
實泣受其言而書之敢以爲邨山之瑩誌請稱曰噫夫邨  
山古之幽宅也穹隆袤廣可以數度自秦漢而降錮其封  
崇極于夸貴俠侈之士不知其幾後今變更高者爲雲煙  
下者爲水泉而慎終送死日相尋於此山愈完而愈新者  
何也夫貴以日計德以世計德足而貴不至者命也恃貴  
而忘德貴將恥之今君秀官于朝將貴矣念先君子之言  
警其宴安彌以自勵吾知田氏之墓滄然而豐茸必戒必  
護衍其子孫益守孝謹雖千百年無變而始田氏之譜者  
由武略愈遠而愈可考者由太僕其尙勉之哉母夫人高  
氏慈儉有家則君秀今爲奉直大夫太僕院判第二德峻

世英葬以某月某日袁梅誌

高夫人葬記代作

嗚呼我先考至元甲申歲七月十有三日不祿昉時年二  
十有一平居嘗言吾宗世居遼陽始祖當金時以征遼功  
封太師有子十人皆拜節度使金亾太師子悉散軼獨曾  
祖岢嵐州節度紹其宗是生大父諱植爲沼州防禦使妣  
大氏夫人沼州生近侍局副使諱世榮副使卒吾時年八  
歲妣王氏夫人寓殯于陝因家焉夫人鞠撫之迄見其成  
人初娶郭氏前元帥左監軍巨濟之女後來大名經歷孫  
用之無子察吾氣宇非凡近遂以汝母歸于我因定居大  
名而自沼州而下藁殯于陝者皆葬于元城縣之令公鄉



清容集卷三十一  
焉先考諱昂字冲霄由轉運幕職拜朝城武陟縣尉能以  
慈惠撫其民盜不敢犯後謝病退居樹德自祕重享年五  
十有九以終昉初掾集賢由院上中書自中書累遷爲左  
司郎中出爲潭州路總管太夫人視聽明徹總覈靡密昉  
盡服王事一不使亂其志意未幾入爲中政院同知拜中  
書省參知政事尙書省立後除江浙省參知政事至大四  
年詔官二品得贈二代由是副使得追贈嘉議大夫大名  
路總管兼府尹上輕車都尉王夫人追封渤海郡夫人先  
考贈中奉大夫參知政事護軍渤海郡公夫人封渤海郡  
太夫人皇慶癸丑昉陞資善大夫爲江浙行中書省左丞  
太夫人年益高屢疏終養延祐元年春復召爲中書省參

知政事奉夫人將北歸使者屢趣就道又未幾改拜集賢  
學士商議中書省事乃不敢辭遂侍夫人來京師是歲十  
月十日以疾終于正寢享年七十有九嗚呼昉不孝先公  
亾恙時不能以祿爲一日之養幸得奉先夫人以自慰垂  
三十年不自殞滅禍罹慈親攀號訴慕實無所容罪將以  
是年十有一月某日葬于先塋日薄未得謁銘于當代謹  
志其梗概納諸壙男一昉女五人長適梁從晦大名等處  
管民提舉次適李允中萬盈屯丞二人蚤卒次適李好義  
承務郎齊河縣尹孫男三人筠孫壽孫和尚孫女一人孤  
子昉泣血謹誌

趙令人葬記代



清容集卷三十一  
三十一  
鳴呼宰孫大父爲郎時先子樂清尹始試吏部靜秀專恪  
鄞史氏號相家刑部再世國子生執禮秉度不以官簿矜  
許先夫人侍永陽王族屬崇近莫敢議昏對永陽尊刑部  
愛樂清遂以歸乃受封令人而始嬪焉夫人姓趙氏諱孟  
柔曾祖師意追爵於吳諡宣獻祖希邈掌宗正食于會稽  
夫人沖默謹視聽儀範不出屏閣相先子以和撫子若女  
無二意距先子葬始一紀夫人以歿歿時年五十有四嗚  
呼養不能盡哀未知稱乃大德丙午合封于樂清之兆而  
先夫人之亾適終喪矣痛徹于天彙事徵德將不懈有俟  
永陽諱與茱夫人爲長女刑部諱能之夫人爲冢婦先子  
諱普卿宰孫爲孤子女一嫁趙孟貫是歲十月甲辰葬謹

馮血爲之記

清容居士集卷第三十



